

溫疫論補注

吳又可溫疫論

印數1—1500  
全書一冊

---

原編者： 吳 又 可

出版·發行

錦 華 書 局

上海太倉路135號

印 刷

聯 義 印 刷 所

上海安慶路331弄14號

---

一九五四年十一月第一次印刷 定價 2,700 元

溫疫論原序

夫溫疫之為病非風非寒非暑非濕乃天地間別有一種異氣所感其傳有九此疫治緊要關節奈何自古迄今從未有發明者仲景雖有傷寒論然其法始自太陽或傳陽明或傳少陽或三陽竟自傳胃蓋為外感風寒而設故其傳法與溫疫自是迥別嗣後論之者紛紛不止數十家皆以傷寒為辭其於溫疫證而甚略之是以業醫者所記所誦連篇累牘俱是傷寒及其臨證悉見溫疫求其真傷寒百無一二不知屠龍之藝雖成而無所施未免指鹿為馬矣余初按諸家咸謂春夏秋皆是溫病而傷寒必在冬時然歷年較之溫瘟四時皆有也尤傷寒每至嚴冬雖有頭疫身痛惡寒無汗發熱總似太陽證至六七日失治未嘗傳經每用發散之藥一汗而解間有不藥亦自解者並未嘗因失汗以致發黃識語狂亂胎動等證此皆感冒膚淺之病非真傷寒也傷寒感冒均係風寒不無輕重之殊究竟感冒居多傷寒希少况溫疫與傷寒感受有霄壤之隔今鹿馬攸分益見真傷寒世所絕少仲景以傷寒為急病倉卒失治多致傷生因立論以濟天下後世用心可謂仁矣然傷寒與溫疫均急病也以病之少者尚諱諱告世至於溫疫多於傷寒十倍安忍反置勿論或謂溫疫之證仲景原別有方論歷年既久兵火湮沒即傷寒論乃稱散亡之餘王叔和立方造論謬稱全書溫疫之論未必不由散亡也明矣崇禎辛巳疫氣流行山東浙省南北兩直患者尤多至五六月益甚或至闔門傳染始發之際時師誤以傷寒法治之未嘗見其不殆也或病家誤聽七日當自愈不爾十四日必瘳因而失治有不及期而死者或有妄用峻劑攻補失序而死者或遇醫家見解不到心疑胆怯以急病用緩藥雖不即受其害然遷延而致死者比比皆是感之輕者尚獲僥倖感之重者更加失治枉死不可勝計嗟乎守古法不合今病以今病簡古書原無明論是以投劑不効醫者徬徨無措病者日近危篤病愈急藥愈亂不死於病乃死於醫不死於醫乃死於聖經之遺亡也吁千載以來何生民不幸如此余雖固陋靜心窮理格其所感之氣所入之門所受之處及其傳變之體平日所用歷驗方法詳述於左以俟高明者正之 告

崇禎壬午年仲秋月姑蘇洞庭吳有性書於淡淡齋

溫疫論補註序

人身血氣之屬不無疾苦而天地氣運之變爰有時行時行之氣太甚血氣之屬不支往往適丁是凶而沿門接戶周遍一方莫不躋於阨危所賴醫藥方術權宜周折斡旋調劑於以回氣化而全生命此不得不一諉諸劫數者也自古有黃帝以來聖神代出各有論著形生人藏府血脈之故參天地陰陽變化之權厥功巍巍既冠古而鑠今而近世賢智之流息心觀理臨證紀驗萃畢世之精神閱歷久而體勘微往往著為方論亦實足以裨益來世輔佐生民此姑蘇又可吳君溫疫一書所以美而可傳也書中窮所受之氣著傳變之體辨別行邪浮越於經不同傷中消息已傳未傳出表入裏疫邪所在之分斟酌達原三消斑汗下吐之方使時疫一證源流悉出前後施治較然不紊可謂卓哉不朽之盛業矣然時或意以執而遂偏僻有略而不盡如論陰證罕有遂不計腎陽素虧陰盛之人不待大汗大下固已急在亡陽迨乎遷延失治真氣愈奪雖比之陰證即用回陽猶恐不及豈可樂付不問於所集條下證涉亡陽惟云大補峻補不立方法至論時疫喜斑不同傷寒為忌是誠卓有所見而舉斑一湯獨宜於誤下斑陷之證及乎正治全未明言如是等類不免智之一失余何人斯敢議前輩獨恐以書為御者不盡馬之情且與師齋識得師半功則吳君臨證施治自神明於是書之外而讀書者或執其所執略其所略正不必一皆吳君之治疫也因是不揣固陋為補註偏者正之缺者補之不及者增益之綱領條目略為次序庶使讀者一目了然非敢自矜度越也竊附於古人之論著亦庶幾生人之一助云爾世臣喬君欲付諸梓余曰是又與於生人者也遂並書之以附於篇端

康熙庚寅年孟夏月新安鄭重光在辛甫識

溫疫論補註上卷目錄

原病

辨明傷寒時疫

溫疫初起

溫疫初起治法

表裏分傳

熱邪散漫

邪在胃膈

傳變不常

統論疫有九傳治法

內壅不汗

邪氣復聚

急證急攻

正名

傷寒正誤

諸家溫疫正誤

補註溫疫名實引經析義上篇

夫溫疫世俗名時證之統辭也其實溫熱與疫各異病也陰陽應象曰冬傷於寒春必病溫金匱真言曰藏於精者春不病溫此溫之因也李東垣曰春月木當發生陽以外泄腎水內竭孰為滋養生化之源既竭木何賴以生乎身之所存者熱也時強木長故曰溫病此溫之與也仲景論曰太陽病發熱而渴不惡寒者為溫病若發汗已身灼熱者名曰風溫風溫為病脈陰陽俱浮自汗出身重多眠睡鼻息必鼾語言難出若被下者小便不利直視失溲若被火者微發黃色急則如驚癇時瘕癲若火薰之一逆尚引日再逆從命期此溫之見證與其治之失也刺熱論曰太陽之脈色榮頤骨熱病也榮未交曰今且得汗待時而已與厥陰脈爭見者死期不過三日其熱病內聯腎少陽之脈色榮頰前熱病也榮未交曰今且得汗待時而已與少陰脈爭見者死此經病連藏不以藏溫熱病死生輕重之權也然而總之與疫無涉何也蓋溫病得之冬不藏精其感發春夏溫熱之氣然而由內達外其病機全責之腎治法全在救少陰是故仲景原論戒汗戒下戒火薰其義蓋躍如也河間劉氏因其感溫熱之氣特製辛涼諸劑然而風木乘強挾熱以銷腎真陰有立盡之象故自汗身重多眠鼻鼾諸證一一皆係在少陰涼膈之用治上不及下猶盡洽仲景本旨且刺熱論並適與仲景相發足太陽膀胱腎府也其色脈已病矣而厥陰爭見則汲取無休足少陽膽肝府也其色脈已病矣而少陰爭見則滋養何出故風木得令而腎水先竭最是危候此東垣李氏所以踟躕顧慮惻然於絕其滋養生化之源者也凡此病機治法比之三焦傳染疫邪何啻霄壤又可吳君知疫病之非傷寒立論辨明而溫之與疫一貫統稱也因為旁引經論辨明溫證如此其疫證治法後辨致詳

補註溫疫名實引經析義下篇

傷寒論辨脈篇云寸口脈陰陽俱緊者法當清邪中於上焦濁邪中於下焦清邪中上名曰潔也濁邪中下名曰渾也陰中於邪必內慄也表氣微虛裏氣不守故使邪中於陰也陽中於邪必發熱頭痛項強頭

學腰痛脛酸所謂陽中霧露之氣故曰清邪中上濁邪中下陰氣為慄足脛逆冷使溺妄出表氣微虛裏氣微急三焦相混內外不通上焦怫鬱藏氣相蒸口爛食斷也中焦不治胃氣上衝脾氣不轉胃中為濁榮氣不通血凝不流若衛氣前通者小便赤黃與熱相搏因熱作使遊於經絡出入藏府熱氣所過則為癰膿若陰氣前通者陽氣厥微陰無所使客氣內入噎而出之聲喘咽塞寒厥相逐為熱所擁血凝自下狀如豚肝陰陽俱厥脾氣孤弱五液注下下焦不闔清使下重令便數難臍築痠痛命將難全此非論傷寒蓋時疫從入之門形證之要傳變之體也叔和集傷寒論於散亡之餘故於此條盡行病證二百六十一字而因首言寸一

論入辨脈亦猶凡遇厥字收入厥陰非長沙本旨也河間劉氏謂疫厲之別脈

不浮者傳染也忌以熱藥解表夫脈既不浮自非外感其云傳染即病氣相傳萬雍所謂近穢氣觸真氣者也然則疫之為病叔和以為異氣劉萬以為傳染又可吳君以為厲氣雜氣有天受有傳染總之則始於天行盛於傳染衰於氣化改革此時疫大致也夫人鼻氣通於天口氣通於地親上親下邪從類感而中州都會必先受邪上行極而下行極而上榮衛漸通則病勢衰內外壅塞則邪方熾陰陽孤厥斯大命臨之此時疫喫緊宗旨也世俗多以疫邪所感同以寒暑六氣因與傷寒溫熱混同一治真屬憤憤吳君斯論謂疫厲非風寒暑濕四時常氣之為病乃別感戾氣邪從口鼻而入伏於募原去表不遠附近於胃越出某經因現某經形證其傳有九統在表裏出表斯順入裏為逆可謂深悉病機適合仲景與旨至其治法喫緊在達原一散乘疫初發破其伏結使邪從中潰出表汗解不致牽纏反復變生他患至於伏邪既潰則出表者解以斑汗入裏者解以吐下榮實斑解衛實汗解上衝怫鬱越而出之解以吐胃濁脾滯決而逐之解以下斑多吐少汗下為常及乎失治臨病消詳凡此綱領條目大經大法真獨闢長沙公秘奧而曲盡其精微於時疫一證蓋卓乎名家矣西昌嘉言喻君嘗引仲景本論剖晰世俗證名謂清邪中上發熱頭痛項強頸攣即大頭蝦蟇等病濁邪中下內慄足冷使溺裏急即絞腸軟脚等病邪注中焦中焦不治胃中為濁營氣不通血凝不流即瓜瓢疔瘡等病然而上焦怫鬱亦或為發頤牙疳營衛熱壅輕則止癰膿畜血且嘉言蓋引論於後而吳君實闡發於前其識其力不較然遠哉所惜謂凡疫邪皆入

胃府陰證罕有好用承氣其失詳辨在陰證罕有條註及是在讀者臨證消詳活變耳茲因原書溫疫通稱名實相混恐致時師眩惑故特各引經論剖析其義如此夫溫病得之冬不藏精時疫得之厲氣傳染一責少陰一責三焦病機治法風馬牛不相及吳君本論原為三焦傳染熱淫時疫而發所著條下原無內經仲景殿少二陰溫證讀者但用以治三陽熱疫萬舉萬當倘遇內發連藏之候自應別會長沙經旨苟因名稱偶混遂忘實證迥殊亦奚可哉要之吳君本為疫著書讀者亦祇還為疫用則思過半矣

注意逐邪勿拘結裏

發斑戰汗合論

戰汗

自汗

盜汗

發斑

狂汗

呃逆

畜血

黃痺乃府病非經病

大便

小便

藥煩

停藥

補瀉兼施

虛煩似狂

神虛譫語

奪氣不語

數下亡陰

下後間服緩劑

下後身反熱

下後脈反數

下後反痞

下後反嘔

下後脈浮

下後脈沉

下格

病愈結存

奪液無汗

老少異治

前後虛實

妄投補劑

妄投破氣藥

妄投寒涼藥

前後虛實

人參宜忌有前利後害之不同

疫解後宜養陰忌投參朮

脈厥

脈證不應

因證易攻

體厥醫案

乘除醫案

瀉結醫案

疊下醫案

下卷目錄

雜氣論

論氣盛衰

論氣所傷不同

似表非表似裏非裏論

標本

行和伏和之別

論陰證世間罕有

論陽證似陰

知一

應下諸證

應補諸證

肢體浮腫

主客交病

輕疫誤補每成痼疾

四損不可正治

服寒劑反熱

舍病治藥

舍病治弊

論食

論飲

勞復

食復

自復

損復

調理法

感冒兼疫

瘧疾兼疫

溫瘧

疫痢兼證

婦人時疫

姙娠時疫

小兒時疫



姑蘇吳有性又可甫著

古欽鄭重光在辛甫補註

襄陵喬國楨世臣甫較梓

○原病

病疫之由昔叔和云凡時行者春時應暖而復大寒夏時應大熱而反大涼秋時應涼而反大熱冬時應寒而反大溫非其時而有其氣是以一歲之中長幼之病多相似者此時行之氣指以為疫余論則不然夫寒熱溫涼為四時之常因風雨陰晴稍為損益假令秋熱必多晴春寒因多雨亦天地之常事未必致疫也傷寒與中暑感天地之常氣疫者感天地之厲氣在歲運有多少在方隅有輕重在四時有盛衰此氣之來無老少強弱觸之者即病邪自口鼻而入則其所客內不在藏府外不在經絡舍於伏膺之內去表不遠附近於胃乃表裏之分界是為半表半裏即內經瘧論所謂橫連募原者也胃為十二經之海十二經皆都會於胃故胃氣能敷布於十二經之中而營養百骸毫髮之間彌所不貫凡邪在經為表在胃為裏今邪在募原者正當經胃交關之所故為半表半裏其熱淫之氣浮越於某經即能現某經之證如浮越於太陽即有頭項痛腰脊強如浮越於陽明即有目痛鼻乾不眠如浮越於少陽即有脇痛耳聾寒熱嘔而口苦大槩邪越太陽居多陽明次之少陽又其次也邪之着人有自天受之有傳染受之所感雖殊其病則一凡人口鼻之氣通乎天氣本氣充實邪不能入經云邪之所湊其氣必虛因本氣虧虛呼吸之間外邪因而乘之昔有三人冒霧早行空腹者死飲酒者病飽食者不病疫邪所着又何異耶若其年疫氣充斥不論強弱正氣稍衰者觸之即病則又不拘於此矣其感之深者中而即發感之淺者邪不勝正未能頓發或因饑飽勞傷憂思氣怒正氣受傷邪氣始張營衛運行之機乃為邪之所阻吾身之陽氣為邪所遏故為病熱矣其始也格陽於內不及於表故先凜凜惡寒甚則四肢厥逆陽氣漸積鬱極而通則厥回而中外皆熱至是但熱而不惡寒者因其陽氣之通此際應有汗或反無汗者存乎邪結之輕重也即便有汗乃肌表之汗若外感在表之邪一汗而解今邪在半表半裡表雖有汗徒損真氣邪氣深伏何能即解必俟其伏邪漸潰表氣潛行於內乃作大戰精氣自內由募中以達表振戰止而復熱此時表

裏相通故大汗淋漓衣被濕透邪從汗解此名戰汗當即脉靜身涼神氣清爽霍然而愈亦有自汗而解者但出表為順即不藥亦自愈也伏邪未潰所有之汗止得衛氣暫通熱亦暫減逾時復熱午後潮熱者至是鬱甚陽氣與時消息也自後加熱而不惡寒者陽氣之積也其惡寒或微或甚者因其人陽氣之甚衰也其發熱或久或不久或晝夜純熱或黎明稍減者因其感邪之重輕也疫邪與瘧彷彿但瘧不內傳惟疫乃傳胃始則皆凜凜惡寒既而發熱又非若傷寒發熱而兼惡寒也至於伏邪發作者有變證其迹或從外解或從內陷從外解者順從內陷者逆更有表裏先後不同有先表而後裏者有先裏而後表者有但表而不裏者有但裏而不表者有表裏偏勝者有表裏分傳者有表而再表者有裏而再裏者外從解者或發斑或戰汗狂汗自汗盜汗從內陷者胸膈痞悶心下脹滿或腹中痛或燥結便秘或熱結傍流或協熱下利或嘔吐惡心譫語唇焦舌黑苔刺等證因證而知變因變而知治此言其大畧詳見脉證治法諸條

○辨明傷寒時疫

或曰子言傷寒與時疫有霄壤之隔今用三承氣桃仁承氣抵當茵陳諸湯皆傷寒方也既用其方必同其證子何言之異也曰夫傷寒必有感冒之因或衣單風露或冒雨入水或臨風脫衣或當簷洗浴隨覺肌膚寒慄既而四肢拘急惡風惡寒然後頭疼身痛發熱惡寒脈浮而數脈緊無汗為傷寒脈緩有汗為傷風時疫初起原無感冒之因忽覺凜凜以後但熱而不惡寒然亦有因所觸而發者或饑飽勞碌或焦思氣鬱皆能觸動其邪是促其發也不因所觸而發者居多促而發者十中之一二耳傷寒投劑可一汗而解時疫發散雖汗不解傷寒不傳染於人時疫能傳染於人傷寒之邪自毫竅而入時疫之邪自口鼻而入傷寒感而即發時疫感久而後發傷寒汗解在前時疫汗解在後傷寒投劑可使立汗時疫汗解俟其內清汗出自然不可以期傷寒解以發汗時疫解以戰汗傷寒發斑則病篤時疫發斑為外解傷寒邪感在經以經傳經時疫以邪在內內溢於經經不自傳傷寒感發甚暴時疫多有淹纏二三日或漸加重或淹纏五六日忽然加重傷寒初起以發表為先時疫初起以疎利為主種種不同其所同者傷寒時疫皆能傳胃至是同歸於一故用承氣湯輩導邪而出要知傷寒時疫始異而終同也夫傷寒之邪自肌表一選傳裏如浮雲之過太虛原無根蒂惟其傳法始終有進而無退故下後皆能脫然而愈時疫之邪始則匿於募原根深蒂固發時與營衛交併客邪經由之營衛未有不被其所傷者因其傷故名曰潰然不潰則不能傳不傳邪不能出邪不出而病不瘳然時疫多有未能頓解者何耶蓋疫邪每有表裏分傳者因有一半向外傳則邪留於肌肉一半向內傳則邪留於胃府邪留於胃故裏氣結滯裡氣結表氣因而不通於於是肌肉之邪不能即達於肌表下後裏氣一通表氣亦順而鬱於肌肉之邪方能達發於肌表或斑或汗然後脫然而愈傷寒下後無有此法雖曰終同及細較之而終又有不同者矣

或曰傷寒感天地之正氣時疫感天地之戾氣氣既不同俱用承氣何藥之相同也曰風寒疫邪與吾身之真氣勢不兩立一有所著氣壅火積氣也火也邪也三者混合失其本來真面目與之俱化為邪矣但以驅逐為功何論邪之同異也假如初得傷寒為陰邪主閉藏無汗傷風為陽邪主開發多汗始有桂枝

麻黃之分原其初感而未化也傳至少陽並用柴胡傳至胃府並用承氣至是亦無風寒之分矣推而廣之是知疫邪傳習亦同治法

○溫疫初起

溫疫初起先憎寒而後發熱嗣後但熱而不憎寒也初得之二三日其脈不浮不沉而數晝夜發熱日晡益甚頭眩身痛其時邪在伏膂之前腸胃之後雖有頭疼身痛此邪熱浮越於經不可認為傷寒表證輒用麻黃桂枝之類強發其汗此邪不在經汗之徒傷衛氣熱亦不減又不可下此邪不在裏下之徒傷胃氣其渴愈甚宜達原散主之

達原散

檳榔二錢 厚朴一錢 草萊仁五分 知母一錢 芍藥一錢 黃芩一錢

甘草五分 右用水二鍾煎八分午後溫服

按檳榔能消能磨除伏邪為疎利之藥又除嶺南瘴氣厚朴破戾氣所結草萊辛烈氣雄除伏邪蟠踞三味協力直達其巢穴使邪氣潰散速離募原是以名為達原散也熱傷津液知母以滋陰熱傷營血加芍藥以和血黃芩清燥熱之餘甘草為和中之用以後四品乃調和之品如渴與水非拔病之藥也 凡疫邪遊溢諸經當隨經引用以助升洩如脇痛耳聾寒熱嘔而口苦此邪熱溢於少陽經也本方加柴胡一錢 如腰背項痛此邪熱溢於太陽經也本方加羌活一錢 如目痛眉稜骨痛眼眶痛鼻乾不眠此邪熱溢於陽明經也本方加葛根一錢但證有遲速輕重不等藥有多寡緩急之分務在臨時斟酌所定分兩大畧而已不可執滯

溫疫初起治法

疫邪感受有輕重感之輕者舌上白苔亦薄熱亦不甚而無數脈其不傳裏者一二劑自解稍重者必從汗解如不能汗乃邪氣蟠結於募原內外隔絕表氣不能通於內裏氣不能達於外不可強汗或者見有加三經發散之藥便欲求汗誤用衣被壅遏或將湯火熨薰甚非正法然表裏隔絕此時無遊溢之邪在

經三陽經加法不必用宜照達原散本方可也感之重者舌上胎如積粉滿布無隙服湯液不從汗解而從內陷者舌根先黃漸至中央邪漸入胃此三消飲證也若脈長洪而數大汗多渴此邪氣適離募原欲表未表此白虎湯證如舌上純黃色兼有裏證邪已入胃此又承氣湯證也有二三日即潰離募原者有半月十數日不傳者有初得之淹淹轟轟五六日陡然勢張者凡元氣勝者毒易傳化元氣薄者邪不易化即不易傳設遇他病久虧適又染疫能感不能化安望其傳不傳則邪不去邪不去則病不瘳延纏日久愈沉愈伏多致不起時師誤認怯證日進參芪愈壅愈固不死不休也

○表裏分傳

溫疫舌上白胎者邪在募原也舌根漸黃至中央乃邪入胃設有三陽形證用達原散三陽加法因有裏證復加大黃名三消飲三消者消內消外消不內不外也此治疫之全劑以毒邪表裏分傳募原尚有餘結者宜之

三消飲

檳榔

厚朴

芍藥

甘草

知母

黃芩

大黃

葛根

羌活

柴胡

薑棗引

補按三陽加法不必全用各隨其所見之經而加用之

○熱邪散漫

溫疫脈長而洪數大渴大汗通身發熱宜白虎湯

白虎湯

石膏一兩

知母五錢

甘草五錢

炒粳米一撮

加薑煎服

按白虎湯辛涼發散之劑清肅肌表氣分之藥也蓋毒邪已潰中結漸開邪氣分離募原尚未出表然內外之氣已通故多汗脈長洪而數白虎辛涼解散服之或戰汗或自汗而解若時疫初起脈雖數未至洪大其時邪氣蟠踞募原宜達原散誤用白虎既無破結之能但求清熱是猶揚湯止沸也若邪已

入胃非承氣不愈誤用既無逐邪之能徒以肅殺而伐胃氣反抑邪毒致脉不行因而細小又認陽證陰脉妄言不治醫見脉微欲絕益不敢議下惟雜進涼藥以為穩當愈治愈危至死無悔此當急投承氣緩緩下之六脉自復

補按脉既微欲絕豈可雜進涼藥必脉沉細有力方可急投承氣否則非下證也

○邪在胃膈

溫邪邪在胸膈滿悶心煩喜嘔欲吐不吐雖吐而不得大吐腹不滿欲飲不能飲欲食不能食此疫邪留於胸膈宜瓜蒂散吐之

瓜蒂散

甜瓜蒂一錢

赤小豆二錢

生山梔仁二錢

右用水二鍾煎一鍾後入赤小豆煎八分先服一

半如不吐再盡服之雖吐猶未解煩滿尚存者再劑煎服如無瓜蒂以淡豆豉一錢代之

○傳變不常

疫邪為病有從戰汗而解者有從自汗盜汗狂汗而解者有無汗竟入胃者有自汗淋漓熱渴反甚終得戰汗而解者有胃氣壅鬱必因下乃得戰汗而解者有因表以汗解裏有餘邪不因他故越三五日前證復發者有發黃因下而愈者有發黃因下而斑出者有竟從發斑而愈者有裏證急雖有斑非下不愈者此雖傳變不常亦疫之常變也有局外之變者男子適逢淫慾或平素下元空虛邪熱乘虛陷於下焦氣道不施以致小便閉塞少腹脹滿至夜即發熱以導赤散五苓散全不得效得大承氣一服小便如注而愈者或素有他病一隅之虧邪乘夙昔所損而傳者如失血崩帶經水適來適斷心痛疝氣痰火喘急凡此皆非常變大抵邪行如水惟注者受之傳變不常皆因人而使蓋因疫而發舊病治法無論某經某病但治其疫而舊病自愈

○統論疫有九傳治法

夫疫之傳有九然亦不出乎表裏之間而已矣所謂九傳者病人各得其一非謂一病而有九傳也蓋溫

疫之氣邪自口鼻而感入於募原伏而未發不知不覺已發之後漸加發熱脈洪而數此衆所同宜達原散疎之繼而邪氣一離募原察其傳變衆人多有不同者以其表裏各異耳有但表而不裏者有但裏而不表者有表而再裏者有裏而再裏者有表裏分傳者有表裏分傳而再分傳者有表勝於裏者有裏勝於表者有先表而後裏者有先裏而後表者凡此九傳其病則一醫者不知九傳之法不知邪之所在如盲者之不任杖聾者之聽宮商無音可求無路可適未免當汗不汗當下不下或顛倒誤用或尋枝摘葉但治其證不治其邪同歸於誤一也

所言但表而不裏者其證頭疼身痛發熱而復凜凜惡寒內無胸滿腹脹等證穀食不絕不煩不渴此邪外傳由肌表而出或自斑消或從汗解斑則有斑疹桃花斑紫雲斑汗則有自汗盜汗狂汗戰汗之異此病氣使然不必較論但求得汗得斑為愈凡自外傳者為順勿藥亦能自愈間有汗出不徹而熱不退者宜白虎湯斑出不透而熱不退者宜舉斑湯有斑汗並行而愈者若斑出不透汗不徹而熱不除者宜白合舉斑湯

間有表而再裏者所發未盡募原仍有隱伏之邪或二三日後或四五日又依然如前發熱脈洪而數及其解也斑者仍從斑解汗者仍從汗愈未愈者仍如前法治之然亦希有至於三表者更希有也

若但裏而不表者外無頭疼身痛繼而亦無三斑四汗惟胸膈痞悶欲吐不吐雖得少吐而不快此邪傳裏之上宜瓜蒂散吐之邪從吐減邪盡病已若邪傳裏之中下者心腹脹滿不嘔不吐或大便秘或熱結傍流或協熱下利或大腸膠閉並宜承氣輩導去其邪邪去病減邪盡病已上中下皆病者不可吐吐之為逆但宜承氣道之則在上之邪順流而下嘔吐立止脹滿漸除矣

有裏而再裏者愈後二三日或四五日依前之證復發在上者仍吐之在下者仍下之再裏者乃常事甚有三裏者然亦希有也雖有上中下之分皆為裏證

若表裏分傳者始則邪氣伏於募原募原者即半表半裏也此傳法以邪氣平分半入於裏則現裏證半出於表則現表證此疫病之常事然表裏俱病內外壅閉既不得汗而復不得下此不可汗強求其汗必

不得汗宜承氣湯先通其裏裏邪先去邪去則裏氣通中氣方能達表向者鬱於肌肉之邪乘勢盡發於肌表矣或斑或吐蓋隨其性而升泄之也諸證悉去既無表裏證而熱不退者募原尚有已發之邪未盡也宜三消飲調之

若表裏分傳而再分傳者照前表裏俱病宜三消飲復下復汗如前而愈此亦常事至於三發者亦希有也

若表勝於裏者募原伏邪發時傳表之邪多傳裏之邪少何以治之表證多而裏證少當治其表裏證兼之若裏證多而表證少者但治其裏表證自愈

若先表而後裏者始則但有表證而無裏證宜達原散有經證者當用三陽加法經證不顯但發熱者不用加法繼而脈洪大兼數自汗而渴邪離募原未能出表耳宜白虎湯辛涼解散邪從汗解脈靜身涼而愈愈後二三日或四五日依前發熱宜達原飲至後反加胸滿腹脹不思飲食煩渴舌上胎刺等證加大黃微利之久而不去在上者宜瓜蒂散吐之如在下者宜承氣湯導之

若先裏而後表者始則發熱漸加裏證下之裏證除二三日內復發熱反加頭痛身疼脈浮者宜白虎湯若下後熱減不甚三四日後精神不慧脈浮者宜白虎湯汗之服湯後不得汗者因津液枯竭也加人參覆臥則汗解此近表裏分傳之證不在此列

若大下後大汗後表裏之證悉去繼而一身盡痛身如被杖甚則不可反側周身骨寒而痛非表證也經氣漸回身痛自愈詳在似表非表條

凡疫邪再表再裏或再表裏分傳者醫家不解反咎病家不善調理以致反復病家不解每責醫家用藥有誤致病復起彼此歸咎殊不知病勢之所當然絕非醫家病家之過但得病者精神完固雖再三反覆可以隨後隨治而愈惟虛怯者不宜也間有延捱失治或治之不得其法日久不除精神耗竭嗣後更醫投藥固當現在之邪拔因而得效殊不知募原尚有伏邪一二日內前證復起反加循衣摸床神思昏憤目中不了了等證大凶之兆也病家不咎前醫之擔誤時日反咎後醫生之投藥殺之良可嘆也當此之



際攻之則元氣幾微是令其速死補之則邪火益熾精氣枯竭守之則正不勝邪必無生理矣

○內壅不汗

疫邪發於半表半裏一定之法也至於傳變或出表或入裏或表裏分傳醫見有表復有裏乃引經論先解其表乃攻其裏此大謬也嘗見以太劑麻黃連進無汗轉加煩躁者何耶蓋發汗之理自內以達表今裏氣壅滯陽氣不能敷布於外即四肢未免厥逆又安能氣液蒸蒸以達表譬如縛足之高乃欲飛升其可得乎蓋鳥之將飛其身必先縱足而後揚翅方得升舉此與戰汗之義同又加水注閉其後數涓滴不通與發汗之義同凡見表裏分傳之證務宜承氣湯先通其裏裏氣一通不待發散多有自能得汗而解者

補須表裏兼見而裏證尤急者先通其裏與傷寒下利清穀急當救裏同法

○邪氣復聚

裏證下後脉不浮煩渴減身熱退越四五日復發熱者此非關飲食勞復乃募原尚有餘邪隱匿因而復發此必然之理不知者每每歸咎於病人誤矣宜再下之即愈但當少與慎勿過劑以邪氣微也

○急證急攻

溫疫發熱一二日舌上白胎如積粉早服達原飲一劑午前舌變黃色隨現胃膈滿痛大渴煩躁此伏邪即潰邪毒傳胃也達原飲加大黃下之煩渴少減熱去六七午後復加煩躁發熱過古變黑生刺鼻如煙煤此邪毒最重復瘀到胃急投大承氣湯傍晚大下至夜半熱退次早鼻黑胎刺如矢此一日之間而有三變數日之法一日之法因其毒甚傳變亦速用藥不得不猛設此證不服藥或投以緩劑羈遲二三日必死設不死服藥亦無及矣常見溫疫二三日即斃者乃此類也

○注意逐邪勿拘結糞

溫疫可下者約三十餘證不必悉具但見舌心黃腹痞滿便於達原欲加大黃下之設邪在募原者已有行動之機欲離未離之際得大黃促之而下實為開門祛賊之法即使未愈邪亦不能久羈二三日後餘

邪入胃仍用小承氣徹其餘毒大凡客邪貴乎早治乘人氣血未亂肌肉未消津液未耗病人不至危殆投劑不至掣肘愈後亦易平復欲為萬全之策者不過知邪之所在早拔其病根為要耳但要諒人之虛實度邪之輕重察病之緩急揣邪氣離募原之多寡然後藥不空投藥無太過不及之弊是以仲景自大柴胡以下立三承氣湯分多與少與必有輕重之殊勿拘於下不厭遲之說應下之證見下無結糞以為下之早或以為不應下而誤投下藥殊不知承氣本為逐邪而非專為結糞設也如必俟其糞結血液為熱所搏變證迭起是猶釀病貽毒醫之過也况多有溘糞失下但蒸作極臭如敗醬如藕泥臨死不結者但得穢惡一去邪毒從此而消證脈從此而退豈徒孜孜糞結而後行哉假如經枯血燥之人或老人血液衰少多生燥結或病後血氣未復亦多燥結在經所謂不更衣十日無所苦有何妨害是知燥結不致損人邪毒能為殞命也要知因邪熱致燥結非燥結而致邪熱也但有病久失下燥結為之壅閉痰邪鬱熱益難得泄結糞一行氣通而邪熱乃去此又前後之不同總之邪為本熱為標結糞又其標也能早去其邪安患燥結乎

或問脈症相同其糞有結有不結者何也曰原其人病至大便當即不行續得蘊熱益難得出蒸作為結也一者其人平素大便不實雖胃家熱甚但蒸作極臭狀如粘膠至死不結應下之證設引經論初鞭後必澹不可攻之句誠為千古之弊

假令滯下本無結糞裏急後重下利窘迫者宜芍藥湯加大黃此豈亦因結糞而然耶乃為逐邪設也或曰得毋為積滯而設歟余曰非也邪氣客於下焦氣血壅滯泣而為積者去積以為治已成之積方去未成之積復生須用大黃逐其邪去是以斷其生積之本營衛氣通其積不治而愈矣此為初起濕熱者論也更有虛痢又非此論泣同澀

### 大承氣湯

大黃五錢

厚朴一錢

枳實一錢

芒硝三錢

水薑煎服

弱人減半邪微者各復減半

小承氣湯

大黃五錢

厚朴一錢

枳實一錢

水薑煎服

調胃承氣湯

大黃五錢

芒硝二錢半

甘草一錢

水薑煎服

按三承氣湯功用彷彿熱邪傳裏但上焦痞滿者宜小承氣湯中有堅結者加芒硝軟堅而潤熱病久失下雖有結糞然多粘膩得芒硝則大黃有蕩滌之能設無痞滿惟存宿結而有痰熱者調胃承氣湯宜之三承氣功效皆在大黃餘皆治標之品不耐湯藥者或嘔或畏當為細末蜜丸湯下

如人方肉食而病適來以致停積在胃用大小承氣連下惟是臭水稀糞而已於承氣湯中但加人參一味服之雖三四十日所停之完穀及完肉於是方下蓋承氣借人參之力鼓舞胃氣宿物始動也

○發斑戰汗合論

凡疫邪留於氣分解以戰汗留於血分解以發斑氣屬陽而輕清血屬陰而重濁是以邪在氣分則易疎透邪在血分恒多膠滯故陽主速而陰主遲所以從戰汗解者可使頓解從發斑者當圖漸愈

○戰汗

疫邪先傳表後傳裏忽得戰汗經氣輸洩當即脉靜身涼煩渴頓除三五日陽氣漸積不待飲食勞碌或有反復者蓋表邪已解裏邪已去纔覺發熱下之即解疫邪表裏分傳裏氣壅閉非汗下不可汗下之未盡日後復熱當復下復汗温疫下後煩渴減腹滿去或思飲食而知味裏氣和也身熱未除脉近浮此邪氣拂鬱於經表未解也當得汗解如未得汗以柴胡清燥湯和之復不得汗者從漸解也不可苛求其汗應下失下氣消血耗既下欲作戰汗但戰而不汗者危以中氣虧微但能降陷不能升發也次日當期復戰厥回汗出者生厥不回汗不出者死以正氣脫不勝其邪也戰而厥回無汗者真陽尚在表氣枯涸也可使漸愈凡戰而不復忽墮者必死墮者身如尸牙關緊自上視凡戰不可擾動但可温覆擾動則戰必中止次日當期復戰戰汗後復下下後越二三日反腹痛不止者欲作滯下也無論已見積未見積宜芍

藥湯

柴胡清燥湯

柴胡 黃芩 陳皮 甘草 花粉 知母 薑棗引水煎湯

芍藥湯

白芍一錢 當歸一錢 檳榔二錢 厚朴一錢 甘草七分 生薑一片

水煎服裏急後重加大黃三錢紅積倍芍藥

○狂汗

狂汗者伏邪中潰欲作汗解因其人稟賦充盛陽氣沖擊不能頓開故忽然坐卧不安且狂且躁少時大汗淋漓狂躁頓止脉靜身涼霍然而愈

○自汗

自汗者不因發散自然汗出也伏邪中潰氣通得汗邪欲去也若脉長洪而數身熱大渴宜白虎湯得戰汗方解若裏證下後續得自汗雖二三日不止甚則四五日不止身微熱甚則汗甚熱微汗亦微此屬實乃表有留邪也邪盡汗止汗不止者宜柴胡以佐之表解則汗止設有三陽經證當用三陽隨經加減法與協熱下利投承氣同義表裏雖殊其理則一若誤認為表虛自汗輒用黃芪實表及止汗之劑則誤矣有裏證時當盛暑多作自汗宜下之白虎證自汗詳見前條若面無神色唇口刮白表裏無陽證喜熱飲稍冷則畏脉微欲絕忽得自汗淡而無味者為虛脫夜發則晝死晝發則夜亡急當峻補補之不及者死大病愈後數日每飲食及驚動即汗出此表裏虛怯宜人參養營湯倍加黃芪

人參養營湯

人參 麥冬 五味子 地黃 當歸 白芍 知母 陳皮

甘草 白芍煎服

補表裏無陽證喜熱畏冷脉微欲絕汗出不鹹此亡陽也但云峻補不及方法未免闕畧宗仲景法

宜附子湯若誤汗亡陽準誤用大青龍湯法以真武湯救逆也

附子湯

附子君白朮君茯苓臣芍藥臣人參臣

○盜汗

裏證下後續得盜汗者表有微邪也若邪甚有自汗若伏邪中潰則作戰汗矣凡人目張則衛氣行於陽目瞑則衛氣行於陰行陽則升發於表行陰則斂降於內今內有伏熱而又遇衛氣兩陽相搏熱蒸於外則腠理開而盜汗出矣若內伏之邪一盡則盜汗自止設不止者宜柴胡湯以佐之時疫愈後脉靜身涼數日後反得盜汗自汗者此屬表虛宜黃芪湯

小柴胡湯

柴胡三錢 黃芩一錢 陳皮一錢 甘草一錢 生薑一錢 大棗二枚

古方用人參半夏今表裏實故不用人參無嘔吐不加半夏

黃芪湯

黃芪三錢 五味子一錢 當歸一錢 白朮一錢 甘草五分 照常煎服

如汗未止加麻黃淨根錢半無有不止者然屬實常多屬虛常少邪氣盛為實正氣奪為虛虛實之分在乎有熱無熱有熱為實無熱為虛若顛倒誤用未免實實虛虛之禍臨證慎諸

○發斑

邪留血分裏氣壅閉則伏邪不得外透而為斑若下之內壅一通則衛氣亦從而疎暢或出表為斑則毒邪亦從而外解矣若下後斑漸出不可更大下證有下證少與承氣湯緩緩下之若復大下中氣不振斑毒內陷則危宜托裏舉斑湯

托裏舉斑湯

赤芍藥 當歸各一錢 升麻五分 白芷 柴胡各七分 川山甲二錢 炙黃

水薑煎服下後斑漸出復大下斑毒復隱反加循衣摸牀撮空理線脈漸微者危本方加人參一錢補不及者死若未下而發斑者設有下證少與承氣湯從緩下法

補按疫溫發斑寒熱虛實皆有之重者二三日便見輕者五六日方出淡紅稀小者吉稠密紫赤者凶

必察元氣虛實脈之有力無力欲出未出葛根升麻湯斑已出不宜再發煩渴甚甚脈洪數者白虎

湯脈虛者加人參○斑色赤紫狂言咽痛者犀角玄參湯熱甚心煩黃連解毒白虎湯○讖語便

秘古焦煩渴大柴胡湯加芒硝微利之○又因元氣素虛先有慾事適感溫疫涼劑過甚寒伏於下

逼其無根失守之火薰灼肺胃而發陰斑脈或散大或沉細其色淡紅惟手足多而胃背少頭面皆

無當做傷寒治法以附子理中湯得溫補之劑陽回而陰火自降此治本不治標也然而此證根本

有傷惟老成練達者十救二二而已本論托裏舉斑湯但可施於下而再下元氣不振斑毒內陷之

證未可通治斑證因采石名家方論以補不及

升麻葛根湯

升麻 葛根 芍藥 甘草

犀角玄參湯

犀角 玄參 升麻 射干 黃芩 甘草

黃連解毒湯

黃連 黃芩 黃柏 梔子

大柴胡湯

柴胡 黃芩 半夏 芍藥 枳實 大黃 生薑 大棗

附子理中湯

人參 白朮 乾薑 甘草 附子等分

真武湯

附子君

茯苓君

芍藥臣

白朮臣

生薑佐

○ 蚘厥

疫邪傳裏胃熱如沸蚘動不安下既不通必反於上蚘因嘔出此常事也但治其胃蚘厥自愈每見醫家引經論以為臧寒蚘上入膈其人當吐蚘又云胃中冷必吐蚘之句使用烏梅丸理中安蚘湯方中乃細辛附子乾薑川椒皆辛熱之品投之如火上添油殊不知疫證表裏上下皆熱始終無寒證者不思現前事理徒記紙上文辭以為依經傍註坦然用之無疑因此誤人甚眾

補按溫疫吐蚘初病皆屬胃熱以邪熱驟發蚘不能安斷非中寒若已汗已下身無大熱不渴時煩或病久不食而吐蚘者定屬虛寒理中輩又所必需

○ 呃逆

胃氣逆則為呃逆吳中稱為冷呃以冷為名遂指為胃寒不知寒熱皆令呃逆且不以本證相參專執俗語為寒遂投丁香薑桂誤人不少此皆執辭害義者尤為不典

按治法各從其本證而消息之如見白虎證則投白虎見承氣證則投承氣膈間鬱閉則宜導痰如果胃寒丁香柿蒂散宜之不若四逆湯功效殊捷要之治本證其呃自止他可類推矣

○ 畜血

時疫大小便畜血初無太陽表證之失汗盡因失下邪熱久羈無由以泄血為熱搏留於經絡敗為紫血溢於腸胃腐而為黑其色如漆大便反易啣雖結糞得血而潤下真元已敗多至危殆其有喜忘如狂者此胃熱波及於血分血乃心之屬血中留火延蔓心家宜其有是證矣乃從胃治

補按畜血後三方皆逐瘀之劑但宜施於畜血未下之先若瘀血不因藥而自下者既言真元已敗多至危殆安可再施承氣抵當乎所謂血脫益氣者急當溫裏以固氣倘瘀未盡而熱未除尚可議犀角地黃若證見虛寒非理中建中何以救危殆乎

發黃一證胃實失下表裏壅閉鬱而為黃熱更不泄搏血為瘀凡邪熱經氣不鬱不致發黃熱不干血分

不致畜血同受其邪故發黃而黃畜血非畜血而致發黃也但畜血一行熱隨血泄黃因隨減嘗見發熱者原無瘀血有瘀血者原不發黃所以發黃當答在經瘀熱若專治瘀血誤也胃於熱於下焦氣分小便不利熱結膀胱也移熱於下焦血分膀胱畜血也小腹硬滿疑其小便不利今小便自利者責之畜血也小便不利亦有畜血者非小便自利便為畜血也胃實失下至夜發熱者熱留血分更加失下必致瘀血初則晝夜發熱日晡益甚既投承氣晝日熱減至夜獨熱者瘀血未行也宜桃仁承氣湯服湯後熱除為愈或熱時前後縮短再服再短畜血盡而熱亦盡大勢已去亡血過多餘熱尚存者宜犀角地黃湯調之至夜發熱亦有瘰癧有熱入血室皆非畜血則非下證更宜詳審

桃仁承氣湯

大黃 芒硝

桃仁

當歸

芍藥

丹皮

照常煎服

犀角地黃湯

地黃一兩

白芍三錢

丹皮二錢

犀角二錢 鎊碎

右先將地黃、水潤透銅刀切片

石臼搗爛再加水如糊絞汁其滓入藥同煎藥成去滓入前地黃汁合服

按傷寒太陽病不解從經傳府熱結膀胱其人如狂血自下者愈血結不行者宜抵當湯今溫疫病初起無表證而惟胃實故腸胃畜血多而膀胱畜血少然抵當湯行瘀逐血之最者無分前後二便并可取用蓋畜血結甚者在桃仁承氣力所不及非抵當湯大毒猛厲之劑不足以抵當故名之然抵當證所遇亦少不過備萬一之用耳

抵當湯

大黃五錢

蟅虫二十枚  
炙為末

桃仁五錢 研  
泥加酒

水蛭五分  
炙乾為末

照常煎服

○黃瘰乃府病非經病

疫邪傳裏移熱下焦小便不利邪無輸泄經氣鬱滯其傳為瘰身目如金者宜茵陳湯

茵陳湯



茵陳一錢

山梔二錢

大黃五錢

水薑煎服

按茵陳為治瘴退黃之專藥也今以病證較之黃因小便不利故用山梔除小腸屈曲之火也瘵熱既除小便自利當以發黃為標小便不利為本及論小便不利病原不在膀胱乃在胃家移熱反當以小便不利為標胃實為本也是以大黃為專功山梔次之茵陳又其次也設去大黃而服山梔茵陳是忘本治標之法鮮有效者或用茵陳五苓散不惟不能退黃小便間亦難利

○大便

熱結傍流協熱下利大便閉結大腸膠閉總之邪在裏其證不同者在乎通塞之間耳

協熱下利者其人大便素不調邪氣忽乘於胃便作煩渴一如平時泄瀉稀糞而色不敗其色但焦黃而已此伏邪傳裏不能稽留於胃至午後潮熱便作泄瀉子後熱退泄瀉亦減次日不作潮熱利亦止為病愈潮熱未除利不止者宜小承氣湯以徹其餘邪而利自止

利止二三日後午後忽加煩渴潮熱下泄仍如前證此伏邪未盡復傳到胃也治法全前夫便閉結者疫邪傳裏內熱壅鬱宿糞不行蒸而為積漸至堅硬下之結糞一行瘵熱自除餘證悉去熱結傍流者以胃家實內執壅閉先大便閉結續得下利純臭水全然無糞日三四度或十數度宜大承氣湯得結糞而利止服湯不得結糞仍下利併臭水及所進湯藥因大腸邪勝失其傳送之職知邪猶在也病必不減宜更下之

大腸膠閉者其人平素大便不實設遇疫邪傳裏但蒸作極臭粘膠至死不結但愈蒸愈閉以致胃氣不能下行疫毒無路而出不下即死但得粘膠一去下證自除而愈矣

溫疫愈後三五日或數日反腹痛裏急者非前病原也此下焦別有伏邪所發欲作滯下也發於氣分則為白積發於血分則為紅積氣血俱病紅白相兼邪盡利止未止者宜芍藥湯方見戰汗條

愈後大便數日不行別無他證此是三陰不足以致大腸虛燥此不可攻飲食漸加津液流通自能潤下也覺谷道裏急宜作蜜煎導之甚則宜六成湯病愈後脈遲細而弱每至黎明或夜半後便作泄瀉此命

門真火不足宜七成湯或亦有雜證屬實者宜太黃丸下之愈下證萬中之一耳

六成湯

當歸錢半

白芍藥一錢

熟地黄五錢

天門冬一錢

肉從蓉三錢

麥門冬一錢

照常煎服日後更發者宜六味丸少減澤瀉

七成湯

破故紙炒碎

熟附子一錢

遼五味八分

白茯苓一錢

人參一錢

甘草五分

照常煎服愈後更發者宜八味丸倍加附子

○小便

熱到膀胱小便赤色邪到膀胱干於氣分小便膏濁干於血分溺血畜血留邪欲出小便數急膀胱不約

小便自遺膀胱熱結小便閉塞

熱到膀胱者其邪在胃胃熱注於下焦在膀胱但有熱而無邪惟令小便赤色而已其治在胃

邪到膀胱者乃疫邪分布下焦膀胱實有之邪不止於熱也從胃家來治在胃兼治膀胱若純治膀胱胃

邪乘勢擁入膀胱非其治也若腸胃無邪獨小便急數或白膏如馬遺其治在膀胱宜豬苓湯

豬苓湯

豬苓一錢

澤瀉一錢

滑石一錢

甘草八分

木通一錢

車前子二錢

燈心煎服

桃仁湯

桃仁三錢

丹皮一錢

當歸一錢

赤芍一錢

阿膠二錢

滑石二錢

照常煎服小腹痛按之硬痛小便自調有畜血也加大黃三錢甚則抵當湯藥分三等隨其病之輕重而施治詳畜血條

○藥類

應下失下真氣虛微及投承氣下咽少頃額上汗出髮根燥癢邪火上炎手足厥冷甚則振戰心煩坐卧不安如狂之狀此中氣素虧不能勝藥名為藥煩凡遇此證急投生薑湯即已藥中多加生薑則無此狀矣更宜均兩三次服以防嘔吐不納

○停藥

服承氣湯腹中不行或次日方行或半日仍吐原藥此因病久失下中氣大虧不能運藥名為停藥乃天元幾絕大凶之兆也宜生薑以和藥性或加人參以助胃氣更有邪實病重劑輕亦令不行

補按此證本論謂病久失下中氣大虧致服承氣湯腹中不行半日仍吐原藥夫食久反出是無火也既半日仍吐原藥則非胃熱乃胃氣虛冷不任苦寒可知此證定因誤下所致而本論既謂天元幾絕大凶之兆其主用止人參生薑一味此非回天救凶之品况加入承氣湯乎若更肢冷脉沉即宜四逆湯加人參倣呃逆治法至於邪實病重胃中壅閉輕劑不行者必不似此半日仍吐原藥也前條藥煩較此稍輕治須同法

○補瀉兼施

證本應下就遲失治或為緩藥因循火邪壅閉耗氣搏血精神殆盡邪火獨存以致循衣摸牀撮空理線肉腠筋惕肢體振戰目中不了了皆緣應下失下之咎邪熱一毫未除元神將脫補之則邪毒愈甚攻之則幾微之氣不勝攻之不可補之不可補瀉不能兩無生理不得已勉用陶氏黃龍湯此證下亦死不下亦死與其坐以待斃莫若舍藥而亡或有回生於萬一

補按此證陰陽兩傷邪熱故在黃龍湯真屬對證之藥然惟亡陰者為合法蓋此證已知吉少凶多臨證更須審決或虛多實多或標急本急憑脉為斷若脉尚實黃龍湯猶恐助邪若脉脫亡陽黃龍湯猶嫌攻多補少救死不及故必合脉證推詳庶可救逆

黃龍湯

大黃 厚朴 枳實 芒硝 人參 地黃 當歸 照常煎服

按前證實為醫家所誤及今投劑補瀉不及然大虛不補虛何由以回大實不瀉邪何由而去勉用參地以回虛承氣以逐實此補瀉兼施之法也或遇此證純用承氣下證思稍減神稍甦續得肢體振戰怔忡驚悸心內如人將捕之狀四肢反厥眩暈鬱冒項背強直併前循衣摸牀撮空等證此皆大虛之候將危之證也急用人參養營湯虛候少回速可屏去蓋傷寒溫疫皆係客邪為火熱燥證人參固為益元氣之神品偏於益陽有助火固邪之弊當此又非良藥不得已而用之人參養營湯方見後

補按前條失治以致精神殆盡邪火獨留元神將脫不得已而用黃龍湯猶慮不救何敢仍蹈虛虛之戒純用承氣湯而輕試乎雖下後暫減未幾即亡陽欲脫則人參養營湯猶嫌其為長陰抑陽之品而非肩弘任大之劑乃服人參稍回微陽未足旋欲屏參則前功必墮若此又不可盡信書矣

○虛煩似狂

時疫坐卧不安手足不定卧未穩則起坐纔着座即亂走纔抽身又欲卧無有宜刻或循衣摸牀撮空然指節至纔診將手縮去六脉不甚顯尺脉不至此平時斲喪根元虧損因不勝其邪元氣不能主持故煩躁不寧固非狂證其危有甚於狂也法當大補然亦有急下者或下後厥回尺脉出煩躁少定此因邪氣稍退正氣暫復微陽少伸也不一時邪氣復聚前證復起勿以前下得效今再下之下之速死急宜峻補補不及者死此證表裏無大熱下證不備者庶幾可生譬如城郭空虚雖殘寇而能直入戰不可守不可其危可知

補按此證坐卧不寧如狂之狀六脉不顯尺脉不至乃根元虧損不勝其邪故煩躁不寧此類陰躁矣法當大補若未經汗下邪猶未解大補尚恐助邪宜微傷寒尺脉不至先用黃芪建中之法若更誤汗下者危宜準傷寒發汗若下之病仍不解煩躁者用茯苓四逆湯法甚者即傷寒振振欲擗地之狀乃亡陽也當用真武湯急救本論惟云大補峻補而不立方主治遵仲景法以補不備

附黃芪建中湯

黃芪一錢 桂枝二錢 芍藥三錢 甘草一錢 生薑三片 大棗二枚

飴糖三錢 照常煎服

茯苓四逆湯

茯苓三錢 附子二錢 甘草一錢 乾薑一錢 人參一錢 照常煎服

○神虛讖語

應下稽遲血竭氣耗內熱煩躁諸下證具而數下之渴熱并減下證悉去五六日後讖語不止者不可以為實此邪氣去元神未復宜清燥養營湯加辰砂一錢鄭巖讖語態度無二但有虛實之分不兩立名色方見後條

○奪氣不語

時疫下後氣血俱虛神思不清惟向牀裏睡似寐非寐似寤非寤呼之不應此正氣奪與其服藥不當莫如靜守虛回而神思自清語言漸爽若攻之脉必反數四肢漸厥此虛虛之禍危在旦夕凡見此證表裏無大熱者宜人參養營湯補之能食者自然虛回而前證自除設不食者正氣愈奪虛證轉加法當峻補補按經云熱病瘡痍不言三四日不得汗者出死此為未經汗下者言也若經下後神思不清呼之不應面壁昏卧此亡陽也若亡陰則人參養營當矣如表裏無大熱而妄攻之致四肢漸厥危在旦夕宜急回陽惟四逆理中輩庶可拯危人參養營何能克濟若能食能言真元未脫脉靜神安者又當靜守本論但言法當峻補而不立方潛擬傷寒治法補之

人參養營湯

人參 麥冬 生地黃 五味子 當歸 白芍 知母 陳皮

甘草 照常煎服

○數下亡陰

下證以邪未盡不得已而數下之間有兩目加澀舌反枯乾津不到咽唇口燥裂緣其人陽藏多火而陰虧今重亡津液宜清燥養營湯設熱渴未除裏證仍在宜承氣養營湯

清燥養營湯

知母 天花粉 白芍藥 陳皮 甘草 當歸身 地黃汁

加燈心煎服表有餘熱宜柴胡養營湯

柴胡養營湯

柴胡 黃芩 陳皮 甘草 當歸 白芍 生地黃 天花粉

知母 薑棗煎服裏證未盡宜承氣養營湯

承氣養營湯

知母 當歸 芍藥 生地黃 大黃 枳實 厚朴

水薑煎服如痰涎湧甚胸膈不清者宜薑貝養營湯

薑貝養營湯

知母 花粉 貝母 瓜蒌實 橘紅 白芍 當歸 紫蘇子

水薑煎服

○下後間服緩劑

下後或數下募原尚有餘邪未盡傳胃邪熱與衛氣相併故熱不能頓除當寬緩兩日俟餘邪聚胃再下之宜柴胡清燥湯調理方見前

○下後身反熱

應下之證下後當脈靜身涼今反發熱者此內結開正氣通鬱陽暴伸也即如爐中伏火撥開雖熾不久自息此與下後脈反數義同若溫疫將發募原其時逐漸加熱胃本無邪誤用承氣更加發熱實非承氣使然乃邪氣方張分內之熱也但嫌下早之誤徒傷胃氣日後傳胃再當之下又有藥煩者與此懸絕詳載本條

○下後脈反數

應下失下口燥舌乾而渴身反熱減四肢時厥欲得近火擁被此陽氣伏也既下厥回去爐減被脉大而加數舌上生津不思水飲此裏邪去鬱陽暴伸也宜柴胡清燥湯去花粉知母加葛根隨其性升泄之此證類白虎但熱渴既除又非白虎所宜也

○下後反痞

疫邪留於心胃令人痞滿下之痞應去今反痞者虛也以其人或因病先虧或因新產後氣血兩虛故稟賦嬌怯因下益虛失其健運邪氣留止故痞滿今愈下而痞愈甚若更用行氣破氣之劑轉成壞證宜參附養營湯

參附養營湯

當歸一錢

白芍一錢

生地黃三錢

附子炮七分

乾薑炒一錢

人參一錢

照常煎服果如前證一服痞如失倘有下證下後脉實痞未除者再下之此有虛實之分一者有下證下後痞即減者為實一者表雖微熱脉不甚數口不渴下後痞反甚者為虛若潮熱口渴脉數而痞者投之禍不旋踵

補按下後反痞痞在上焦本為氣分之病不干於營雖有參附乾薑恐不敵歸地芍藥之兩倍然辨論虛實甚詳若寒熱混淆難施純熱當做仲景治法嘔而發熱柴胡證具而以他藥下之心下滿而不痛者以半夏瀉心湯主之若心下痞而復惡寒汗出者用附子瀉心湯主之亦寒熱互用此仲景之成法宜參證而治焉因本論以養營立名夾用歸地芍藥又不若三黃苦而瀉痞辛以散結也附註以備採用

附半夏瀉心湯

半夏三錢

黃芩一錢

乾薑錢半

人參一錢

大棗二枚

甘草一錢

照常煎服

附子瀉心湯

大黃二錢

黃連一錢

黃芩一錢三味沸一刻絞去

熟附子三錢煎汁內三黃湯中重煎溫服日二次

○下後反嘔

疫邪留心於胸胃口熱甚皆嘔不止下之嘔當去今反嘔者此屬胃氣虛寒少進米飲便欲吞酸者宜半夏藿香湯一服嘔止穀食漸加

半夏藿香湯

半夏一錢半

藿香一錢

乾薑炒一錢

白茯苓一錢

陳皮一錢

白朮炒一錢

甘草五分

水薑煎服

按證有前後首尾兩變者有患時疫心下脹滿口渴發熱而嘔此應下之證也下之諸證減半再下之脹除熱退渴止向則晝夜不眠今則少寐嘔獨轉甚此疫毒去而諸證除胃續寒而嘔甚與半夏藿香湯一劑而嘔即止

○下後脉浮

裏證下後脉浮而微數身微熱神思或不爽此邪熱浮於肌表裏無壅滯也雖無汗宜白虎湯邪從汗解若大下後或數下後脉空浮而數按之豁然如無宜白虎湯加人參覆杯則汗解下後脉浮而數原當汗解遲延五六日脉證不改仍不得汗者以其人或自利經久或素有他疾先虧或本病日久不痊或反復數下以致週身血液枯涸故不得汗白虎辛涼除肌表散漫之熱邪加人參以助周身之血液於是經絡潤澤元氣鼓舞腠理開發故得汗解

○下後脉復沉

裏證脉沉而數下後脉浮者當得汗解今不得汗後二三日脉復沉者募原餘邪復聚到胃也宜更下之更下後脉再浮者仍當汗解宜白虎湯

○下格

溫疫愈後脉證俱平大便有二三日不行時作嘔飲食不進雖少與湯水嘔吐愈如此為下格然下既不



通必返於上設誤認為及胃乃與牛黃狗寶及誤作寒氣以藿香丁沉二陳之類亦誤也宜調胃承氣湯熱服頓下宿結及瀉糞膠粘惡物嘔吐立止所謂欲求南風須開北牖是也嘔吐慎勿驟補若少與參芪則下焦復閉嘔吐又作也此與後條病愈結存彷彿彼則妙在往來蛙戲一證故不嘔而能食證有毫厘之差遂有千里之異按二證大便俱閉脉靜身涼一安一危者在乎氣通氣塞之間而已矣

○病愈結存

溫疫下後脉證俱平腹中有塊按之則痛自覺有所阻而膨悶或時有升降之氣往來不利常作蛙戲此邪氣已盡其宿結尚未除也此不可攻攻之徒傷元氣氣虛益不能傳送終無補於治結須飲食漸進胃氣稍復津液流通自能潤下也常遇病愈後食粥半月結塊方下堅黑如石

○奪液無汗

溫疫下後脉沉下證未除再下之下後脉浮者法當汗解三五日不得汗者其人預亡津液也溫疫得下證日久失下日逐下利純臭水晝夜十數行乃致口燥唇乾舌裂如斷醫者按仲景協熱下利治法與葛根黃連黃芩湯服之轉劇余診視乃熱結傍流急與大承氣湯一服去宿糞甚多色如敗醬狀如粘膠臭惡異常是晚利止次日服清燥湯一劑脉尚沉再下之脉始浮下證減去肌表尚存微熱此應汗解雖不得汗然裏邪先盡中氣和平所以飲食漸進半月後忽作戰汗表邪方解蓋緣下利日久表裏枯燥之極飲食半月津液漸回方能得汗所謂積流而渠自通也可見脉浮身熱非汗不解血燥津枯非液不汗昔人以奪血無汗今以奪液亦無汗血液雖殊枯燥則一則知溫疫非藥可得汗者矣

○老少異治論

三春旱草得雨滋榮殘臘枯枝雖灌弗澤凡年高之人最忌剝削設投承氣以一當十設用參朮十不抵一蓋老年營衛枯澆幾微之元氣易耗而難復也不比少年氣血生機甚捷其勢淳然但得邪氣一退正氣隨復所以老年慎瀉少年慎補何況誤用也亦有年高稟厚年少賦薄者又當從權勿以常論

○前後虛實論

病有先虛後實者宜先補而後瀉先實而後虛者宜先瀉而後補假令先虛後實者或因他病先虧或因年高血弱或先有勞役或因新產下血過多或舊有吐血及崩漏之疾溫疫將發觸動舊疾或吐血或崩漏以致亡血過多然後疫氣漸漸加重以上並宜先補而後瀉瀉者謂疎導之劑併承氣湯下藥藥而言之也凡遇先虛後實者此萬不得已而投補劑一二貼若虛證少回便宜治疫若補劑連進必助疫邪禍害隨至假令先實而後虛者疫邪應下失下血液為熱搏盡原邪尚在宜急下之邪退六七急宜補之虛回六七慎勿再補多服則前邪復起下後必竟加添虛證者方補若以意揣度其虛不見虛證用補貽害不淺矣

○妄投補劑論

有邪不除淹纏日久必致厄羸時醫望之輒用補劑殊不知無邪不病邪氣去正氣得通何患其虛之不復也今投補劑邪氣益固正氣日鬱轉鬱轉熱轉熱轉瘦轉瘦轉補轉補轉鬱循環不已乃至骨立而斃猶言服參幾許補之不效天數也病家只誤一人醫家終身不悟奈之何哉

○妄投破氣藥論

溫疫心下脹滿邪在裏也若純用青皮枳實檳榔諸香燥破氣之品冀其寬脹此大膠也不知內壅氣閉原有主客之分假令根於七情鬱怒肝氣上升飲食過度胃氣填實本無外來邪毒客氣相干只不過自身之氣壅滯投木香砂仁荳蔻枳壳之類上升者即降氣閉者即通無不見效今疫毒之氣傳於胸胃以致升降之氣不和因而脹滿實為客邪累及本氣但得客氣一除本氣自然升降脹滿立消若專用破氣之劑但能破正氣毒邪何自而泄脹滿何由而消治法非用小承氣弗愈既而腸胃燥結下既不通中氣鬱滯上焦之氣不能下降因而充積即募原或有未盡之邪亦無前進之路於是表裏上中下三焦皆阻故為痞滿燥實之證得大承氣一行所謂一竅通諸竅皆通大關通而百關皆通也向所鬱於腸胃之邪由此而下腸胃既舒在募原設有所傳不盡之餘邪方能到胃乘勢而下也譬如河道阻塞前舟既行餘舟連尾而下矣至是邪結并去脹滿頓除皆借大黃之力大黃本非破氣藥以其潤而最降故能逐邪拔

毒破結導滯加以枳朴者不過佐使云爾若純用破氣之品津液愈耗熱結愈固滯氣無門而出疫毒無路而泄乃望其寬脹利膈感之甚矣

○妄投寒涼藥論

疫邪結於募原與衛氣併因而晝夜發熱五更稍減日晡益甚此與瘧瘧相類瘧瘧熱短過時熱退如失明日至期復熱此溫疫長熱十二時中首尾相接寅卯之間乃其熱之首尾也即二時餘燭不清似乎日夜皆熱且其始也邪結募原氣併為熱胃本無病誤用寒涼妄伐生氣此其誤者一及邪傳胃煩渴口燥舌乾胎刺氣噴如火心腹痞滿午後潮熱此應下之證若用大劑芩連梔柏專用清熱竟不知熱不能自成其熱皆由邪在胃家阻礙其正氣鬱而不通火亦留止積火成熱但知火與熱不知因邪而為火熱智者必投承氣逐去其邪氣行火泄而熱自已若概用寒涼何異揚湯止沸每見今醫好用黃連解毒湯黃連瀉心湯蓋本素問熱淫所勝治以寒涼以為聖人之言必不我欺况熱病用寒藥最是合證又何疑乎每遇熱甚反指大黃能瀉而損元氣黃連清熱且不傷元氣更無下瀉之患且使病家無有疑慮守此以為良法由是凡遇熱證大劑與之二三錢不已增至四五錢熱又不已晝夜連進其病轉劇至此技窮力竭反謂事理當然又見有等日久腹皮貼脊乃調胃承氣證况無痞滿益不敢議用承氣惟彙聚苦寒專務清熱又思寒涼之最者莫如黃連因而倍之日近危篤有邪不除耽誤至死猶言服黃連幾兩熱不能清非藥之不到或言不治之證或言病者之數也他日凡遇此證每每如是雖父母妻子不過以此法治之蓋不知黃連苦而性溫寒而氣燥與大黃均為寒藥大黃走而不守黃連守而不走一燥一潤一通一溫相去甚遠且疫首尾以通行為治若用黃連反招閉塞之害邪毒何由以泄病根何由以拔既不知病原焉能却病耶

或問曰間有得黃連而見效者何也曰其人正氣素勝又因所受之邪本微此不藥自愈之證醫者誤投補劑轉補鬱鬱轉熱此以三分客熱轉加七分本熱也客熱者因客邪所鬱正分之熱也此非黃連可愈本熱者因誤投溫滯止氣轉鬱及致熱極故加煩渴不眠譫語等證此非正分之熱乃醫家添造分

外之熱也。因用黃連於是煩渴不眠。謔語等證。頓去要之黃連。但可清去七分。無邪本熱。又因熱減而正氣得回。所存三分有邪。客熱氣行即止也。醫者不解。遂以為黃連得效。他日藉此概治客熱。則無效矣。必以首效而今不效。疑其病原本重。非藥之不到也。執迷不悟。所害更不可勝計矣。

又問曰。間有未經溫補之誤。進黃連而病愈者。何也。曰。凡元氣勝病為易治。病勝元氣為難治。元氣勝病。氣雖誤治。未必皆死。病勝元氣者。稍誤。未有不死者。此因其人元氣素勝。所感之邪本微。是正氣有餘。足以勝病也。雖與黃連不能抑鬱正氣。此為小逆。以正氣猶勝。而疾幸愈也。醫者不解。竊自邀功。他日設遇邪氣勝者。非導邪不能瘳。其疾誤投黃連。反招閉塞之害。未有不危者。

○人參宜忌有前利後害之不同

凡人參所忌者。裏證耳。邪在表及半表半裏者。投之不妨。表有客邪者。古方如參蘇飲。小柴胡湯。敗毒散。是也。半表半裏者。如久瘧。挾虛用補。中益氣。不但無礙。而且得效。即使暴瘧。邪風正盛。投之不當。亦不至脹為無裏證也。夫裏證者。不指傷寒溫疫傳胃。至於雜證。氣鬱血鬱。火鬱濕鬱。鬱食鬱之類。皆為裏證。投之即脹者。蓋以實填實也。今溫疫下後。適有暫時之通。即投入參。因而不脹。醫者病者。以為用參之後。雖不見佳處。然不為禍。便為是福。乃恣意投之。殊不知參乃實裏之補藥。下後雖通。餘邪尚在。再四服之。則助邪真。實前證復起。禍害隨至矣。間有失下。以致氣血虛耗者。有因邪盛數下。及大下而挾虛者。遂投入參。當覺精神爽慧。醫者病者。皆以為得意。明後日再三投之。即如變證。蓋下後始則胃寒。乍虛。沾其補益。而快殊。不思餘邪未盡。恣意投之。則漸加壅閉。邪火復熾。愈投而變證愈增矣。所以下後邪緩。虛急。是以補性之效速。而助邪之害緩。故前後利害之不同者。有如此。

○疫解後宜養陰忌投參朮

夫疫乃熱病也。邪氣內鬱。陽氣不得宣布。積陽為火。陰血每為熱搏。暴解之後。餘焰尚存。陰氣未復。大忌參芪。白朮得之。反助其壅鬱。餘邪留伏。不惟目下淹纏。日後必變生異證。或周身痛痺。或四肢攣急。或流火結痂。或遍身瘡瘍。或兩腿鑽痛。或勞嗽湧痰。或毒氣流注。或痰核穿漏。皆驟補之害也。凡有陰枯血燥。

者宜清燁養營湯若素多痰及少年平時肥盛者投之恐有膩膈之患亦宜斟酌大抵溫疫愈後調理之劑投之不當莫如靜養節飲食慎起居為上計也

○脈厥論

溫疫得裏證神色不敗言動自如別無怪證忽然六脈如絲沉細不應指似有如無或兩手俱無或三手先伏察其人不應有此脈有此脈者皆緣應下失下內結壅閉營氣逆於內不能達於四肢此脈厥也亦有過用黃連石膏諸苦寒藥強遏其熱致邪愈結脈愈不通醫見脈微欲絕以為陽證得陰脈為不治委而棄之以此誤人甚多若更用人參生脈散禍不旋踵宜承氣湯緩下之六脈自復

○詠證不應論

溫疫表證脈不浮者可汗而解以邪氣微不能牽引正氣故脈不應 裏證脈不沉者可下而解以邪氣微不能抑遏正氣故脈不應 陽證見陰脈有可生者神色不敗言動自如乃稟賦脈也問平素無此脈者乃脈厥也 下後脈實亦有病愈者但得病減復有實脈乃天年脈也夫脈不可一途而取須以神氣形色病證相參以決安危為善

○因證數攻

溫疫下後二三日或一二日古上復生苔刺邪未盡也再下之苔刺雖未去已無鋒芒而輒然熱渴未除更下之熱渴減胎刺脫日後更復熱又生胎刺更宜下之余里周因之者患疫月餘胎刺凡三換計服大黃近斤始得熱不復作其餘脈證方退所以凡下不以數計有是證則投是藥醫家見理不透經歷未到中道生疑往往遇此證反致耽擱但其中有間日一下者有連下三四日者有應連下二日間一日者其間寬緩之中有應用柴胡清燥湯者有應用犀角地黃湯者至投承氣某日應多與某日宜少與其間不能得法亦足以悞事此非可以言傳貴乎臨時斟酌

○疊下醫案

朱海疇者年四十五歲患疫得下證四肢不舉身臥如塑目閉口張舌上胎刺問其所苦不能答因問其

子兩三日所服何藥云進承氣湯三劑每劑大黃兩許不效更無他策惟待日而已但不忍坐視更祈一診余診得脉尚有神下證悉具樂輕病重也先投大黃一兩五錢目有時而轉動再投舌刺無芒口漸開能言三劑古胎少去神思稍清四日服柴胡清燥湯五日復生芒刺煩熱又再加之七日又投承氣養營湯熱少退八日仍用大承氣湯肢體方能少動計半月共服大黃十二兩而愈數日後始進糜粥調理兩月方平復曾治多人所遇此證百中僅有者姑存案以備參酌耳

○體厥醫案

陽證陰脉身冷如冰為體厥施幼聲賣卜頗行年四旬稟賦肥甚六月患溫疫口燥舌乾胎刺如鋒不時太息咽喉腫痛心腹脹滿按之痛甚渴思冰水日晡益甚小便赤澁得消滴則痛甚此下證悉具但通身肌表如冰指甲青黑六脉如絲尋之則有稍按則無醫者不究裏證熱極但引陶氏全生集以為陰證以手足厥逆若冷過乎肘膝便是陰證今已通身冰冷比之冷過肘膝更甚宜其為陰證一也且陶氏以脉分陰陽二證全在有力無力中分今已脉微欲絕按之如無比之無力更甚宜其為陰證二也陰證而得陰脉之極有何說焉其內諸陽證皆置不問遂投附子理中湯未服延余至以脉相參表裏互較此陽證之最甚者下證悉具但嫌下之晚耳蓋因內熱之極氣道壅閉熱極反兼水化內經之亢害證也乃至脉微欲絕此脉厥也陽鬱則四肢厥冷若素稟肥盛尤易壅閉今亢陽已極以至通身冰冷此體厥也六脉如無者羣龍無首之象證亦危矣投大承氣湯囑其緩緩下之脉至厥回便得生也其妻聞一曰陰證一曰陽證天地懸絕疑而不服更請一醫拈言陰毒須炙丹田其兄疊延三醫續至皆言陰證妻乃惶惑病者曰何不卜之神明遂得從陰則吉從陽則凶更惑於群醫之議陰證者居多乃進附子湯下咽如火煩燥頻加乃嘆曰吾已矣藥之所誤也言未已更加躑躅逾時乃卒嗟乎向以卜謀生終以卜致死可為巫卜之鑑

○乘除醫案

病有純虛純實非補即瀉何有乘除設遇既虛且實者補瀉間用當詳孰先孰後從少從多可緩可急隨

且證而調之吳江沈音來令正少寡素多鬱怒而有吐血證歲三四發吐後即已無有他證蓋不以為事也三月間別無他故忽有小發熱頭疼身痛不惡寒而微渴若惡寒不渴者乃感冒風寒今不惡寒而渴者疫也至第二日舊病大發吐血勝常更加眩暈手戰煩燥種種虛象飲食不進且熱更加重醫者病者但見吐血以為舊證復發不知其為疫也故以發熱認為陰虛頭疼身痛認為血虛不察未吐血前一日已有前證非吐血已後所加之證也諸醫議補問予可否余曰失血補虛權宜則可蓋吐血者內有結血正血不歸經所以吐也結血牢固豈能吐乎能去其結於中無阻血自歸經方冀不發若吐後專補內則血滿既滿不歸血從上溢也設用寒涼尤誤投補劑者只顧目前之虛用參耆效不能拔去病根日後又發也况又兼疫今非昔比今因疫而發病血脫為虛邪在為實是虛中有實如投補劑始則以實填虛沾其補益既而以實填實災害並至於是參二錢以歸芍茯苓佐之兩劑後虛證咸退熱減六七醫者病者皆謂用參有效均欲速進余禁之不止乃恣意續進便覺心胃煩悶腹中不和若有積氣求噦不得此氣不時上升便欲作嘔心下難過遍體不舒終夜不寐喜按摩捶擊此皆外加有餘之變證也所以然者止有三分之疫只應三分之熱適有七分之虛經絡枯溢陽氣內陷故有十分之熱分而言之其間是三分實熱七分虛熱向則本氣空虛不與邪搏故不現有餘之證但虛不任邪惟懊懣鬱冒眩暈而已今投補劑是以虛證之熱減去六七所餘三分之熱實熱也乃是病邪所致斷非人參可除者今再服之反助疫邪邪正相搏故加有餘之變證因少與承氣微利之而愈按此病設不用利藥宜靜養數日亦愈以其人大便一二日一解則知胃氣通行邪氣在內日從胃氣下趨故能自愈間有大便自調而不愈者腸中迴環處有結糞不下下得結糞始愈設邪未去恣意投參病乃益固日久不除醫見病體漸瘦便指為怯證愈補愈危至於不救

○瀉結脈案

張崑源乃正年六旬得滯下證後重窘急日三四十度脈常歇至請醫以為雀啄脈必死之候感不用藥延余診視其脈參伍不調或兩動一止或三動一止而復來此瀉結脈也年高血弱下利膿血六脈短瀯

固非所能任詢其飲食不減形色不變聲音烈烈言語如常非危證也遂用芍藥湯加大黃三錢大下純膿成塊者兩碗許自覺舒暢脉氣漸續而利亦止數年後又得傷風咳嗽痰涎湧甚診之又得前脉與杏桔湯一劑嗽止脉即調乃見其婦凡病善變此脉大凡治病務決形色脉證相參庶不失誤乃可定其吉凶也

溫疫論補註卷下

雜氣論

日月星辰天之有象可睹水火山石地之有形可末昆蟲草木動植之物可見寒熱溫涼四時

之氣往來可覺至於山嵐瘴氣嶺南毒霧咸得地之濁氣猶可以察惟天地之雜氣種種不一亦猶天之

星辰有雜計夢感地之土石有雄硫礬信草木有野葛巴豆昆蟲有毒蛇猛獸氣交之中萬物各有善惡

是雜氣亦有優劣也然此氣無象可見况無聲無臭何能得睹得聞人惡得而知是氣也其來無時其着

無方眾人觸之者各隨其氣而為諸病焉其為病也或時眾人發頤或時眾人頭面浮腫俗名為大頭瘟

是也或時眾人咽痛或時音啞俗名為蝦蟆瘟是也或時眾人瘡癩或為痺瘡或為斑疹或為

瘡疥疔腫或時眾人目赤腫痛或時眾人嘔血暴下俗名為瓜瓢瘟探頭瘟是也或時眾人癭核俗名為

疔瘡瘟是也為病種種難以枚舉大約病過于一方延門闔戶眾人相同此時行疫氣即雜氣所鍾為病

各種是知氣之不一也蓋當其特識有某氣專入某臟府經絡專發為某病故眾人之病相同非闔藏府

經絡或為之證也不可以年歲四時為拘蓋非五運六氣所能定者是知氣之所至無時也或發於城市

或發於村落他處安然無有是知氣之所着無方也疫氣者亦雜氣中之一但有甚于他氣故為病頗重

因名之屬氣雖有多寡不同然無歲不有至於瓜瓢瘟疔瘡瘟緩者朝發夕死急者頃刻而亡此又諸疫

之最重者幸而百十年來間有之不可以常疫并論也至於發頤咽痛目赤斑疹之類其時村落中偶有

一二人所患者雖不與眾人等致其證甚合某年某處眾人所患之病纖悉相同治法無異此即當年之

雜氣但目今所鍾不厚所患者希少耳此又不可以眾人無有斷為非雜氣也雜氣為病最多然舉世皆

誤認為六氣假如誤認為風者如大麻風鶴膝風痛風風節風老人中風腸風屬風之類概用風藥未嘗



一效實非風也皆雜氣為病耳又誤認為火者如疔瘡發背癰疽流注流火丹毒與夫發痘疹之類以為痛癢瘡瘍皆屬心火投芩連知藥未嘗一效實非火也亦雜氣之所為耳至於誤認為暑者如霍亂吐瀉瘧痢暴注腹痛絞腸痧之類皆誤認為暑作暑證治之未嘗一效與暑何與焉

至於一切雜證無因而生者并皆雜氣所成蓋因諸氣來而不知感而不覺惟向風寒暑濕所見之氣求之既已錯認病原未免誤投他藥劉河間作原病式蓋祖五運六氣百病皆原於風寒暑濕燥火無出此六氣為病者實不知雜氣為病更多於六氣六氣有限現在可測雜氣無窮茫然不可測專務風寒暑濕燥火不言雜氣豈能包括天下之病歟

○論氣盛衰

其年疫氣盛行所患者重最能傳染即童輩皆知其為疫至於微疫似覺無有益毒氣所鍾有輕重也其年疫氣衰少里閭所患者不過幾人且不能傳染時師皆以傷寒為名不知者固不言疫知者亦不便言疫然則何以知其為疫蓋脈證與盛行之年所患之證纖悉相同至於用藥取效毫無差別是以知溫疫四時皆有常年不斷但有多寡輕重耳

疫氣不行之年微疫轉有眾人皆以感冒為名實不知為疫也設用發散之劑雖不合病然亦無大害疫自愈實非藥也即不藥亦自愈至有稍重者誤投發散尚淺若誤用補劑及寒涼反成痼疾不可不辨

○論氣所傷不同

所謂雜氣者雖曰天地之氣實由方上之氣也蓋其氣從地而起有是氣則有是病譬如所言天地生萬物然亦由方上之產也但植物藉雨露而滋生動物藉飲食而頤養蓋先有是氣然後有是物推而廣之有無限之氣因有無限之物也但二五之精未免生剋制化是以萬物各有宜忌宜者益而忌者損損者制也故萬物各有所制如貓制鼠鼠制象之類既知以物制物即知以氣制物矣以氣制物者譬得霧則死棗得霧則枯之類此無形之氣動植之物皆為所制也至於無形之氣偏中於動物者如牛瘟羊瘟雞瘟鴨瘟豈當人疫而已哉然牛病而羊不病鷄病而鴨不病人病而禽獸不病究其所傷不同因其氣各

異也知其氣各異故謂之雜氣夫物者氣之化也氣者物之變也知氣可以制物則知物之可以制氣矣夫物之可以制氣者藥物也如蜈蚣解蜈蚣之毒猫肉治鼠瘻之潰此受物之氣以為病還以物之氣制之至於受無形雜氣為病莫知何物之能制矣惟其不知何物之能制故勉用汗吐下三法以當之嗟乎即三法且不能盡善况能知物乎能知以物制氣一病只須一藥之到而病自已不煩君臣佐使品味加減之勞矣

似表非表似裏非裏論

時疫初起邪氣蟠踞於中表裏阻隔裏氣滯而為悶表氣滯而為頭疼身痛因見頭疼身痛往往誤認為傷寒表證因用麻黃桂枝香蘇萬根敗毒九味羌活諸湯皆發散之劑強求其汗妄耗津液經氣先傷邪氣不損依然發熱更有邪氣傳裏表氣不能通乎內必壅於外每至午後潮熱甚則頭脹痛熱退則已此豈表實者耶以上似表誤為表證妄投升散之劑經氣愈實邪氣上升頭疼轉甚須下之裏氣一通經氣降而頭疼立止若果感冒頭疼無時不痛為可辨也且有別證相參不可一途而取若汗若下後脈靜身涼渾身肢節反加痛甚一如被杖一如墜傷少動則痛苦號呼此經氣虛營衛行溢也三四日內經氣漸回其痛漸止雖不藥必自愈誤妄引經論以為風濕相搏一身盡痛不可轉側遂投疎風勝濕之劑身痛反劇似此誤人甚眾

傷寒傳胃即便譫語下之無辭今溫疫初起便作潮熱甚亦能譫語誤認為裏證妄用承氣是為誅伐無辜不知伏邪附近於胃邪未入府亦能潮熱午後熱甚亦能譫語不待胃實而後能也假令常產熱甚亦作譫語痺瘧不惡寒但作潮熱此豈胃實者耶以上似裏證誤投承氣裏氣先虛及邪陷胃轉見胃腹脹滿煩渴益甚病家見勢危篤以致更醫醫見下藥病甚乃指大黃為砒毒或投瀉心或投柴胡枳桔留邪在胃變證日增神脫氣盡而死向則不應下而下今則應下而反失下蓋因表裏不明用藥前後失序之誤也

諸竅乃人身之戶牖也邪自竅而入未有不由竅而出經曰未入於府者可汗而已入於府者可下而已麻徵君復增汗吐下三法總是導引其邪從門戶而出可為治之大綱舍此皆治標云爾今時疫首尾一於為熱獨不言清熱者是知因邪而發熱但能治其邪不治其熱而熱自己夫邪之與熱猶形影相依形亡而影未有獨存者若以黃連解毒湯黃連瀉心湯純乎寒涼專務清熱既無汗吐下之能焉能使邪從竅而出是忘其本徒治其標何異於小兒捕影

○行邪伏邪之別

凡邪所客有行邪有伏邪故治法有難有易取效有遲有速假令行邪者如正傷寒始自太陽或傳陽明或傳少陽或自三陽入胃如行人經由其地本無根蒂因其漂泊之勢病形雖重若果在經一汗而解若果在胃一下而愈藥到便能獲效先伏而後行者所謂溫溫之邪伏於募原如烏棲巢如獸藏穴營衛所不關藥石所不及至其發也邪毒漸張內侵於府外淫於經營衛受傷諸證漸顯然後可得而治之方其浸淫之際邪毒尚在募原必待其或出表或入裏然後可導引而去邪盡方愈初發之時毒勢漸張莫之能禦其時不惟不能即瘳而病證日惟加重病家見病日增即欲更醫醫家不解亦自驚疑竟不知先時感受邪甚則病甚邪微則病微病之輕重非關于醫人之生死全賴於藥所以疫邪方張之際勢不可遏但使邪毒速離募原便是治法全在後段工夫識得表裏虛實更詳輕重緩急投劑不致差謬如是可已萬舉萬全即使感受之最重者按法治之必無殞命之理若夫久病枯削酒色耗竭耆耄風燭者此等已是天真幾絕更加溫疫自是難支又不可同日而語矣

○論陰證世間罕有

傷寒陰陽二證方書皆以對待言之凡論陽證即繼之陰證讀者以為陰陽二證世間均有之病所以臨診之際先將陰陽一證在于胸次往來躊躇最易致誤甚有不辨脈證但窺其人多蓄少艾或適在妓家或房事後得病或病適至行房醫問及此便疑為陰證殊不知病之將至雖尼僧寡婦室女童男曠夫閭宦亦皆有之與房慾何與焉即使多蓄少艾頓宿妓家房事後適病病適至行房此際偶值疫邪發於募

原氣壅火鬱未免發熱到底終是陽證與陰證何與焉况行時溫疫原非受寒安得有陰證似陽者而陽證似陰者何日無之究其所以然者蓋傷寒與溫疫傳入胃家陽氣內鬱不能外布即便四逆所謂陽厥是也又曰厥微熱亦微厥深熱亦深其厥深者甚至涼過肘膝脈沉而微劇則通身冰冷脈微欲絕雖有輕重之分總之為陽厥因其觸目皆似陰寒苟不得其要領於是誤認者良多况且溫疫每類傷寒若分別不清最易混淆夫溫疫熱病也從無感寒陰自何來一也治溫疫數百人纔遇二三正傷寒二也及治正傷寒數百人纔遇二三真陰證三也又何必纔見傷寒便疑陰證况多溫疫又非傷寒者乎

補按前論溫疫陰證罕有者乃感不正之氣原未感寒自無直中陰經之證至於傳變皆有六經豈止

專入陽明能禁其不入三陰者乎惟因人質之厚薄不同耳若人質本厚傳入三陰邪熱益深乃為

傳經熱證其古焦便秘煩躁譫語消渴等證雖屬陽明而厥少二陰熱證亦皆類此因胃為五臟六

府之海借大承氣湯瀉胃土以救腎水即兩陰傳經熱證亦主承氣湯豈獨陽明哉若人質澆薄腎

陽素虧冬不藏精正氣衰微能感不能化大熱滾滾脈沉足冷邪熱久燦真氣熱消或誤汗誤下誤

服苦寒元氣不振邪不外解必致內搏裏氣本虛不能內實而為熱證至七八日轉變虛寒陡現亡

陽諸證或真氣衰微厥逆脈沉而細或真陽外越發熱脈大無根面赤戴陽陰躁陰斑汗呃下利欲

飲冷水席地而卧此即陰證似陽矣須急回陽遲則寒戰汗利而脫當此危證安得不用真武四逆

湯以救逆也溫疫毒多此證所謂寒傷偏死下虛人也本論條中每遇此證但言危殆宜大補峻補

皆不立方主治似乎闕略總之虛者必寒實者必熱虛者傳陰變為虛寒實者傳陰轉為實熱如質

厚者大汗天下霍然而愈質薄者汗下變證而篤此理明矣仲景辨脈論而證類時疫者云寸口脈

陰陽俱緊者法當清邪中於上焦濁邪中於下焦清邪中上名曰潔也濁邪中下名曰渾也陰中於

邪必內慄也表氣微虛裏氣不守故使邪中於陰也陽中於邪必發熱頭痛全文載前蓋天地有陰

陽人稟天地而生則身中亦有陽陰天之寒熱溫涼本一氣也因四時而變更病之寒熱陰陽雖二

氣也因人虛實而變證若謂溫疫無直中之陰寒則合經旨若謂全不干陰一皆於陽恐未盡然也

○論陽證似陰

凡陽厥手足皆冷或冷過肘膝甚至手足指甲皆青紫劇則遍身冰冷如石血凝紫黑成片或六脈無力或脈微欲絕以上脈證悉見純陰猶以為陰證者何也及審內證氣噴如火齩爛口臭煩渴譫語口燥舌乾舌胎黃黑或生芒刺心腹痞滿小腹疼痛小便赤色涓滴作痛非大便燥結即大腸膠閉非協熱下利即熱結傍流以上內三焦悉見陽證所以為陽厥也麤工不察內多下證但見表證脈體純陰誤投溫劇禍不旋踵

凡陽證似陰者溫疫與正傷寒通有之其陰證似陽者乃正傷寒家事溫疫無有此證故不附載溫疫陽證似陰者始必由募原以漸傳裏先幾日發熱以後四肢逆冷傷寒陽證似陰者始必由陽經發熱脈浮而數邪氣自外漸次傳裏裏氣壅閉脈體方況乃至四肢厥逆蓋非一日矣其真陰證始則惡寒而不發熱其脈沉細當即四肢逆冷急投附子回陽二三日失治即死

捷要辨法凡陽證似陰外寒而內必熱故小便血赤凡陰證似陽者格陽之證也上熱下寒故小便清白但以小便赤白為據

補按陽厥冷不過肘膝者居多即冷過肘膝者一時必回溫依然發熱即週身厥冷寒戰脈伏者一時必熱大汗一出脈復病解如天欲雨陰雲四佈雨霽朗照溫疫戰汗類此乃熱厥也必從陽治若厥逆終日不回溫兼有冷汗呢利則當詳辨陰陽其舌胎乾黑亦有陰極似陽食壓太陰少陰誤汗誤下逼其虛陽於上者必不大渴脈來無力可辨小便赤白不足盡憑三陰病下焦陽虛氣化不清小便亦赤濁不必澄徹清冷方為寒也須察脈之陰陽辨餘證之虛實未可以一證便為憑也

○知一

醉而難

邪之著人如飲酒然凡人醉酒脈必洪而數氣高身熱面目俱赤乃其常也及言其變各有不同有醉後妄言妄動醒後全然不知者有雖沉醉而神思終不亂者醉後應面赤而反刮白者應痿弱而反剛強者應壯熱而反惡寒戰慄者有易醉而易醒者有難醉而難醒者有發呵欠及嘔噎者有頭眩眼花及頭疼

者因其氣血虛實之不同藏府稟賦之各異更兼過飲少飲之別攷其情狀各自不同至於醉酒則一也及醒一時諸態如失凡受疫邪始則晝夜發熱日晡益甚頭疼身痛舌上白胎漸加煩渴乃眾人之常也及言其變各自不同者或嘔或吐或咽取乾燥或痰涎湧甚或純發熱或發熱而兼凜凜或先凜凜而後發熱或先惡寒而後發熱或先一日惡寒而後發熱以後即純發熱再後漸漸寒少而熱多以至純純者或晝夜發熱者或但朝熱餘時稍緩者有從外解者或戰汗或狂汗自汗盜汗或發斑有漸消者有從內傳者或胸膈痞悶或心腹脹滿或心痛腹痛或胸脇痛或大便不通或前後癱閉或協熱下利或熱結傍流有黃胎黑胎者有口燥舌裂者有舌生芒刺舌色赤紫者有鼻孔如烟煤之黑者有發黃及畜血衄血大小便血汗血嗽血齒衄血有發頤疔瘡瘡者有首尾能食者有絕穀一兩月者有無故善反復者有愈後漸加飲食如舊者有愈後飲食勝常二三倍者有愈後退爪脫髮者至論惡證口噤不能張昏迷不識人足屈不能伸唇口不住牽動手足不住振戰直視圓睜目瞤上視口張聲啞舌強遺尿遺矢項強發瘧手足俱痠筋惕肉瞤循衣摸牀撮空理線等證種種不同因其氣血虛實之不同藏府稟賦之各異更兼感重感輕之別攷其證候各自不同至論受邪則一也及邪盡諸證如失所謂知其一萬事畢知其要者一言而終不知其要流散無窮此之謂也

以上止舉一氣因人而變有歲氣稍不同者有其年眾人皆從自汗而解者更有其年眾人皆從戰汗而解者此又因氣而變餘證大同小異皆疫氣也又雜氣為病一氣自成一病每病各又因人而變統而言之其變不可勝言醫者能通其變方為盡善

○應下諸證

舌白胎漸變黃胎 邪在募原舌上白胎邪在胃家舌上黃胎胎老變為沉香色也白胎未可下黃胎宜

下

舌黑胎 邪毒在胃薰騰於上而生黑胎有黃胎老而變焦色者有津液潤澤作軟黑胎者有舌上乾燥

作硬黑胎者下後二三日黑皮自脫又有一種舌上俱黑而無胎此經氣非下證也姪姪多見此陰證亦

有此皆非下證下後裏證去舌尚黑者胎皮未脫也不可再下務在有下證方可下舌上無胎况無下證誤下舌反見鰐魚黑色者危急當補之補此少陰虛寒證宜人參四逆湯

舌芒刺 熱傷津液此疫毒之最重者急當下老人微疫無下證舌上乾燥易生胎刺用生脈散生津潤燥芒刺自去

舌裂 日久失下血液枯極多有此證又熱結傍流日久不治在下則津液消亡在上則邪火毒熾亦有此證急下之裂自合

舌短 舌硬 舌卷 皆邪氣勝真氣虧急下之邪毒去真氣回舌自舒

舌砂胎 舌上白胎乾硬如砂皮一名水晶胎乃自白胎之時津液乾燥邪雖入胃不能變黃宜急下之白胎潤澤者邪在募原也邪微胎亦微邪氣盛胎如積粉滿布其舌猶未可下久而胎色不變別有下證服三消飲次早舌即變黃

唇燥裂 唇焦色 唇口皮起 鼻孔如煙煤 口臭 胃家熱多有此數證固當下之唇口皮起仍用

別證互較鼻孔煤黑疫毒在胃下之無辭

口燥渴 更下有證者宜下之下後邪去胃和渴自減若服花粉門冬知母冀其生津止渴殊謬若大汗

脈長洪而渴未可下宜白虎湯更得微汗身涼渴止

目赤 咽乾 氣噴如火 小便赤紅涓滴作痛 小便極臭 揚手擲足 脈沉而數 皆為內熱之

極下之無辭

潮熱 邪在胃有此證宜下然又有不可下者詳在似裏非裏熱血入室神虛譫語三條之下

善太息 胃家實呼吸不利胸膈痞悶每欲引氣下行故也

心下滿 心下高起如塊 心下痛 腹脹滿 腹痛按之愈病 心下脹滿 以上皆胃家邪實內結

氣閉宜下之氣通則已

頭脹痛 胃家實氣不下降下之頭痛立止初起頭痛別無下證者未可下

小便閉 大便不通氣結不舒大便秘行小便立解誤服行氣利水藥無益

大便閉 轉屎氣極臭 更有下證下之無辭有血液枯竭者無表裏證為虛燥宜蜜引導及胆導法

大腸膠閉 其人平日大便秘不實設過疫邪傳裏但蒸作極臭粘膠至死不結但愈蒸愈粘愈閉以致胃

氣不能下行疫毒無路而出不下即死但得粘膠一下證自除而愈

協熱下利 熱結傍流 並宜下詳見大便條下

四逆 脈厥 體厥 并屬氣閉陽氣鬱內不能四布於外胃家實也宜下之下後反見此證者為虛脫

宜補宜溫

發狂 胃家實陽氣盛也宜下之有虛煩似狂有因欲汗作狂并詳見本條之忌下

○應補諸證

向謂傷寒無補法者蓋傷寒時疫均是客邪然傷於寒者不過分寒乃天地之正氣尚嫌其填實而不可

補今感疫氣者乃天地之毒氣補之則壅塞其毒邪火愈熾設誤補之為害尤甚於傷寒此言其常也及

言其變則又有應補者或日久失下形神幾脫或久病先虧或先受大勞或年老枯竭皆當補瀉兼施設

因下而增虛證者宜急峻補此證微見前條虛證補回切忌再補詳見前條補後虛證不退及加變證者危

下後虛證不見乃臆度其虛輒用補劑法所大忌凡用補劑本日不見佳處即非應補蓋人參為益元氣

之極品開胃氣之神丹下咽之後其效立見若用參之後元氣不回胃氣不轉者勿謂人參之功不捷蓋

因投之不當耳急宜另作主張若恣意投之必加變證如加而更投之者死

○肢體浮腫

時疫潮熱而渴舌黃身痛心下滿悶腹痛時痛脈數此應下之證也外有通身及面目浮腫喘急不已小便

不利此疫兼水腫因三焦壅閉水道不行也但治其疫水腫自己宜上承氣湯向有單腹脹而後疫者治

在疫者先年曾患水腫因疫而發者治在疫水腫自愈病人通身浮腫下體益甚臍凸陰囊并莖腫大色

白小便不利此水腫也繼又身大熱午後益甚煩渴喘急心下滿悶大便不調此又加疫也因下之下後



反加復脹宜承氣加甘遂二分弱人量咸蓋先腫脹續得溫疫此水腫兼疫大水在表微疫在裏也故並治之時疫愈後數日先自足浮腫小便不利漸腫至心腹而喘此水氣也宜治在水時疫愈後數日先自足浮腫小便如常雖通身浮腫而不喘別無所苦此氣復也蓋血乃氣之依歸氣先血而生無所依歸故暫浮腫但靜養節飲食不樂自愈時疫身體羸弱言不足以聽氣不足以息得下證少與承氣下證稍減若更與之眩暈欲死蓋力不足以勝也絕穀期月稍補則心腹滿悶攻不可補不可守之則元氣不鼓餘邪沉匿募原日惟水飲而已以後心腹忽加腫滿煩冤者向來沉匿之邪方悉分傳於表裏也宜承氣養營湯一服病已設表腫未除宜微汗之自愈時疫得裏證失下以致面目浮腫小便自利此表裏氣滯非兼水腫也宜承氣下之裏氣一疎表氣亦順浮腫頻除或見絕穀期月指為脾虛發腫誤補心劇姪媛更多此證治法同前則子母俱安但當少與慎無過劑共七法

### 主客交病

凡人向有他證冠羸或久瘧或內傷瘀血或吐血使血咳血男子遺精白濁精氣枯涸女人崩漏帶下血枯經閉之類以致肌肉消削邪火獨存故脈近於數此際稍感疫氣醫家病家見其穀食暴絕更加胸膈痞悶身疼發熱徹夜不寐指為原病加重誤以絕穀為脾虛以身痛為血虛以不寐為神虛遂投參朮歸地茯神棗仁之類愈進愈危知者稍以疫法治之發熱減半不得時睡穀食稍進但數脈不去肢體時疼胸膈雖痛過期不愈醫以藥頻試補之則邪火愈熾瀉之則損脾敗胃滋之則膠邪愈固散之則經絡益虛疎之則精氣愈耗守之則日消近死蓋但知其伏邪已潰表裏分傳裏證雖除不知正氣衰微不能托邪出表邪留不去因與血脈合而為一結為痼疾也肢體時疼者邪與營氣搏也脈數身熱不去者邪火並鬱也脇下錐痛者火邪結于膈膜也過期不愈者邪未脫也凡疫邪近在一七遠在二七甚至三七過此不愈者因失其治非壞證即痼疾也所謂客邪膠固於血脈主客交渾最難得解久而愈錮治法當乘其大肉未消真元未敗急用三甲散多有得生日更附加減法隨其平素而調之

驚甲

龜甲并用酥炙黃為末 川山甲土炒黃為蟬退 洗淨

蠶蠶白直者切斷 牡蠣煨為末五分 如

廣蟲三個乾者劈碎 鮮者搗爛和酒少許 取汁入湯蒸同服其渣入諸藥同煎

白芍藥酒炒七分

當歸五分

甘草三分

水二鐘煎八分 憑渣溫服 若素有老瘡或瘰癧者加牛膝一錢 何首烏一錢 胃弱欲作瀉者宜九蒸九曬 若素有鬱痰者加貝母一錢 有老痰者加瓜蒌霜五分 善嘔者勿用 若咽乾作癢者加花粉知母各五分 若素燥咳者加杏仁搗爛一錢 五分 若素有內傷瘀血者倍厲蟲以乾漆炒烟盡為度 研末五分 及桃仁搗爛一錢代之 服後病減半勿服 當用調理法

○輕疫誤治每成痼疾

凡客邪皆有輕重之分 惟疫和感受輕者人所不識 往往誤治而成痼疾 假令患劇晝夜無度 水穀不進 人皆知其為痢也 其感之輕者有晝夜雖行四五度 飲食如常起居如故人 亦知其輕 劇未嘗誤以他病治之者 憑有積滯耳 至於溫疫感之重者 身熱如火 頭疫身痛 胸腹脹滿 胎刺譫語 斑黃狂躁 人皆知其危疫也 其有感淺者 微有頭疫身痛 午後微有潮熱 飲食不甚 減但食後或覺脹滿 或覺惡心 脈微數 如是之疫最易誤認 即醫家素以傷寒溫疫為大病者 今因證候不顯 多有不覺其為疫也 且人感疫之際 來而不覺 既感不知 最無憑據 又因所感之氣薄 今發時證不甚 現雖有頭疫身痛 况飲食不絕 力可徒步 又焉得知其疫也 病人無處追求 每每妄訶病原 醫家不善審察 未免隨情認錯 有如病前適有小勞 病人不過以此道其根 由醫家不辨是非 便引東垣勞倦傷脾 元氣下陷 乃執甘溫除大熱之句 隨用補中益氣湯 壅補其邪 轉壅轉熱 轉熱轉瘦 轉瘦轉補 多至危殆 或有婦人患此 適逢產後 醫家便認為陰虛發熱 血虛身痛 遂投四物湯 及地黃丸 泥滯其邪 遷延日久 病邪益固 遯福女科無出 滋養陰血 屢投不效 復更涼血通瘀 不知原邪仍在 積熱自是不除 日漸延羸 終成廢疾 凡人未免七情勞鬱 醫者不知為疫 乃引丹溪五火相扇之說 或指為心火上炎 或指為肝火衝擊 惟彙聚寒涼 冀其直折 而反凝注其邪 徒傷胃氣 疫邪不去 痰熱何清 延至骨立而斃 或有宿病淹纏 適逢微疫 未免身痛 醫家同認為

病加重仍用前藥加減有防於疫病益加重至死不悟者如是種種難以盡述

○四損不可正治

凡人大勞大慾及大病久病後氣血兩虛陰陽並竭名為四損當此之際忽又染疫邪氣雖輕並為難治以正氣先虧邪氣自陷故諺有云傷寒偏死下虛人正謂此也蓋正氣不勝者氣不足以息言不足以聽或欲言而不感邪雖重反無脹滿痞塞之證誤用承氣不劇即死以正氣愈損邪氣愈伏也

若真血不足者面色萎黃唇口刮白或因吐血崩漏或因產後亡血過多或因腸風藏毒所致感邪雖重面目又無陽色誤用承氣速死以營血愈消邪氣益加沉匿也

若真陽不足者或四肢厥冷或下利清穀肌體惡寒恒多泄瀉至夜益甚或口鼻冷氣感邪雖重反無發熱燥渴胎刺等證誤用承氣陽氣愈消陰凝不化邪氣留而不行輕則姜頻重則下咽立斃

若真陰不足者自然五液乾枯肌膚甲錯感邪雖重應汗不汗應厥不厥誤用承氣病益加重以津液枯涸邪氣溢滯無輸泄也凡遇此等不可以常法正治當從其損而調之調之不愈者稍以常法治之治之不及者損之至也是故一損二損輕者或可挽回重者治之無益乃至三損四損雖虛扁亦無所施矣以

枯魄獨存化源已絕不復滋生也

○服寒劑反熱

陽氣通行溫養百骸陽氣壅閉鬱而為熱且夫人身之火無處不有無時不在但喜通達耳不論臟腑經絡表裏上下血分氣分一有所阻即便發熱是知百病發熱皆由於壅鬱而火鬱又根於氣氣常靈而火不靈火不能自運賴氣為之運所以氣升火亦升氣降火亦降氣行火亦行氣若阻滯而火屈曲熱斯發矣是氣為火之舟楫也今疫邪透於募原氣為之阻時疫到胃是求伸而未伸也今投寒劑抑遏胃氣氣益不伸火更屈曲所以反熱也往往服苓連知藥之類病人自覺反熱其間偶有靈變者言我非黃連證亦不知其何故也終以寒涼清熱熱不能清竟置弗疑服之反熱全然不悟雖至白首終不究心

悲夫

嘗遇微疫醫者誤進白虎湯數劑續得四肢厥逆脈勢轉劇更醫謬指為陰證投附子湯病愈此非治病實治藥也雖誤病原藥則偏中醫者之福也蓋病本不藥自愈之證因連進白虎寒涼肅殺抑遏胃氣以致四肢厥逆疫邪強伏故病增劇今投溫劑胃氣通行微邪流散若果直中無陽陰證誤投白虎一劑立斃豈容數劑耶

○舍病治弊

一人感疫發熱煩渴思飲冰水醫者以為凡病須忌生冷禁止甚嚴病者苦索勿與遂至兩目火迸咽喉焦燥不時烟焰上騰晝夜不寐目中見鬼病劇苦甚自謂但得冷飲一滴下咽雖死無恨於是遂乘隙劑匄竊取井水一盆置之枕傍飲一杯頓覺清涼二杯鬼物不見三杯咽喉聲出四杯筋骨舒暢飲至六杯不知杯落枕傍竟自熟睡俄而大汗如雨衣被濕透脫然而愈蓋其人瘦而多火素稟陽藏始則加之以熱經絡枯燥既而傳表不能作正汗而解誤投升散則病轉劇今得冷飲表裏和潤所謂除弊便是興利自然汗解宜矣更有因食因痰因寒劑而致虛陷疾不愈者皆當舍病求弊以此類推可以應變於無窮矣

○論食

時疫有首尾能食者此邪不傳胃切不可絕其飲食但不宜多食耳有愈後數日微熱不思食者此微邪在胃正氣衰弱強與之即為食復有下後一日便思食食之有味當與之先與米飲一小杯加至茶甌漸進稀粥不可盡意飢則再與如忽加吞酸反覺無味乃胃氣傷也當停穀一日胃氣復即思食也仍如漸進法有愈後十數日脈靜身涼表裏俱和但不思飲食者此中氣不甦當與粥飲迎之得穀後即思食覺飢久而不思食者一法以人參一錢煎湯與之少引胃氣忽覺思食便可勿服

○論飲

煩渴思飲酌量與之若引飲過多自覺水停心下名停飲宜四苓散如大渴思飲冰水及冷飲無論四時

皆可量與蓋內熱之極得冷飲相救甚宜能飲一升只與半升宜使少頃再飲再於梨汁藕汁蔗漿西瓜皆可備不時之需如不欲飲冷當易百沸湯與之乃至不思飲則知胃和矣

四苓散

茯苓散錢

澤瀉一錢五分

豬苓一錢五分

陳皮一錢

取長流水煎盛古方有五苓散用桂枝者以以陽中風表證本罷併入膀胱用四苓以利小便加桂枝以解表邪為雙解散即如少陽併子胃以大柴胡合表裏而治之今人但見小便不利使用桂枝何異聾者聽官商胃本無病故用白朮以建中今不用白朮者疫邪傳胃而渴白朮性壅恐以實填實也加陳皮者和中利氣也

○勞復

疫邪已退脈證俱平但元氣未復或因梳洗沐浴或因多言妄動遂至發熱前證復起惟脈不沉不實為辨此名勞復蓋氣為火之舟楫今其氣方長勞而復折真氣既虧火亦不前某經氣陷則火隨陷於某經陷于經絡則為表熱陷于臟府則為裏熱虛甚熱甚虛微熱微治法輕則靜養可復重則宜補氣血其氣一回血脈融和表裏通暢所陷之火隨氣輸泄自然熱退而證自愈若誤用承氣及寒涼剝劑之劑變證蜂起卒至殞命宜服安神養血湯

安神養血湯

茯神

棗仁

當歸

遠志

桔梗

芍藥

地黃

陳皮

甘草

加龍眼肉水煎服

○食復

若因飲食所傷者或吞酸作嘔或心腹滿悶而加發熱此名食復輕則損穀自愈重則消導乃退

○自復

若無故自復者以疫邪未盡此名自復當問前得某證所見何病稍與前藥以徹其餘邪自然獲效

○損復

邪之傷人也始而傷氣繼而傷血傷肉傷筋傷骨和毒既退始而復氣繼而復血復肉復筋復骨以柔脆者易損亦易復也

天傾西北地陷東南故男先傷右女先傷左及其復也男先復左女先復右以素虧者易損以素實者易復也

嚴正甫年三十時疫後脈證俱平飲食漸進忽然肢體浮腫別無所苦此即氣復也蓋大病後血未成氣暴復血乃氣之依歸氣無所依故為浮腫嗣後飲食漸加浮腫漸消若投行氣利水藥則謬矣

張德甫年三十患噤口痢晝夜無度肢體僅存皮骨痢雖減毫不進穀以人參一錢煎湯入口不一時身忽浮腫如吹氣毬自後飲食漸進浮腫漸消腫間已有肌肉矣

若大病後三焦受傷不能通調水道下輸膀胱肢體浮腫此水氣也與氣復懸絕宜金匱腎氣丸及腎氣煎若誤用行氣利水藥必劇凡水氣足冷肢體常重氣復足不冷肢體常輕為異

余桂五年四十時疫後四肢脫力竟若癱瘓數日後右手先動繼則左手亦動桂岡媳所患皆然

○調經法

凡人胃氣強盛可飢可飽若久病之後胃氣薄弱最難調理蓋胃體如竈胃氣如火穀食如薪合水穀之精微升散為血脈者如焰其糟粕下轉為糞者如燼是以竈大則薪多火盛薪斷而餘焰猶存若些小錯釜只宜新數並稍多則壅滅稍斷則火絕矣若夫大疾之後客邪新去胃口方開幾微之氣所當接續多與早與遲與皆非所宜須先與粥飲次糜粥循序漸進先後勿失其時當設爐火晝夜勿令斷絕以備不時之用思穀即與稍緩則胃飢如灼再緩則胃氣傷反不思食矣既不思食若照前與之雖食而弗化弗化則傷之傷之則為食復矣已成食復則當選用前食復本條矣又當如初進法若更多與及粘硬之物胃氣壅甚必脹滿難支氣絕穀存乃至反復顛倒形神俱脫而死矣

○感冒兼疫

疫和伏而未發因感冒風寒觸動疫邪相繼而發既有感冒之因由復有風寒之脈證先投發散一汗而

解一二日續得頭疼身痛潮熱煩渴不惡寒此風寒去疫邪發也以疫法治之

○瘧疾兼證

瘧疾二三發後七八發後忽然晝夜發熱煩渴不惡寒舌上胎刺心腹痞滿飲食不進下證漸具此時疫已著瘧疾隱也用疫法治之

時疫晝夜純熱心腹痞滿飲食不進下後脈靜身涼或間日或每日時惡寒而復發熱如期者此溫疫解瘧邪未盡也以瘧法治之

○溫瘧

凡瘧者寒熱如期而發餘時脈靜身涼此常瘧也以瘧法治之設傳胃者必裏現證名為溫瘧以疫法治者生以瘧法治者死裏證者下證也下後裏證除寒熱獨存者是溫疫減瘧證在也瘧邪未去者宜疎邪去瘧勢衰者宜截瘧久而挾虛者宜補疎以清脾飲截以不二飲截以四君子湯方見瘧門因恐雜亂此不附載

補內經曰溫瘧者得之冬中于風寒氣藏于骨髓至春則陽氣大發邪氣不能自出因遇大暑腦髓燥肌肉消腠理開泄或有所用力邪氣與汗皆出此病藏於腎其氣先自內出之於外也如是者陰虛而陽盛陽盛則熱矣衰則氣返復入入則陽虛陽虛則寒矣故先熱而後寒也按此與疫瘧不同須分別治法

疫痢兼證

下痢膿血更加發熱而渴心腹痞滿嘔而不食此疫痢兼證最為危急夫疫者胃家事也蓋疫邪傳胃下常八九既傳入胃必從下解疫邪不能自出必借大腸之氣傳送而下其疫方愈夫痢者大腸內事也大腸既病失其傳送之職故正糞不行純乎下痢膿血而已所以向來穀食停積在胃直須大腸邪氣退而胃氣通行正氣始得因而下出今大腸失職正糞尚自不行又何能代胃洩毒而出毒氣不去羈留在胃敗壞真氣在胃一日有一母之害一時有一時之害耗氣搏血神脫氣盡而死凡遇疫痢兼證者在痢尤

為喫緊疫痢俱急者宜橫芍順氣湯誠為一舉兩得

橫芍順氣湯 專治下痢頻數裏急後重兼舌胎黃得疫之裏證者

橫柳 芍藥 枳實 厚朴 大黃 生薑煎服

○婦人時疫

婦人傷寒時疫與男子無異惟經水適斷適來及崩漏產後與男子稍有不同夫經水之來乃諸證血滿歸注于血室下瀉為月水血室者一名血海即衝任脈也為諸經之總任經水適來疫邪不入于胃乘勢入於血室故夜發熱語語蓋衝氣盡行于陽不與陰爭故晝則明了夜行于陰與邪相搏故夜則發熱語語至夜但發熱而不譫語者亦為熱入血室因有輕重之分不必拘于譫語也經曰無犯胃氣及上二焦必愈胸膈併胃無邪勿以譫語為胃實而妄攻之但熱隨血下故自愈若有如結胸狀者血因邪結也當刺期門以通其結以柴胡湯治之不若刺者功捷經水適斷血室空虛其邪乘勢傳入邪勝正虧經氣不振不能鼓散其邪為難治且不從血瀉邪氣何由即解與適來者有血虛血實之分宜柴胡養榮湯新產亡血過多衝任空虛與夫素善崩漏經氣久虛皆能受邪與經水適斷同法

○妊娠時疫

孕婦時疫設應用三承氣湯須隨證施治慎毋惑於參朮安胎之說病家見用承氣先自驚疑或更左右阻撓必致醫者掣肘為子母大不幸若應下之證反用補劑和火壅鬱熱毒愈熾胎愈不安搏氣搏血胞胎何賴是以古人有懸鐘之喻梁厲而鐘未有不墮者惟用承氣逐去其邪火毒消散熯煩為清涼氣和而胎自固用藥去病又見大黃為安胎之聖藥經曰有改無殞此也若腹痛如錐腰痛如折此時未墮欲墮之候服藥亦無及矣雖投承氣但可愈疾而全母暗者以為胎墮必反咎於醫也或詰其故余曰妊娠結糞瘵熱腸胃間事也胎附于脊胃腸之外子宮內事也藥先到胃瘵熱纔通胎氣始得舒養是以與利除害於頃刻之間何慮之有但投藥之際病衰七八餘邪自愈慎勿過劑耳愚治歷效子母俱安

凡孕婦時疫設有四損者不可正治當從其損而調之產後同法非其損而誤補必死四損詳見前應補



諸證條後

小兒時疫 凡小兒感冒風寒瘧痢等證人所易知一感時疫人所難窺以致錯誤者多蓋由幼科專於痘疹吐瀉驚疳併諸雜證在傷寒時疫則畧而未嘗究心一也古人稱幼科為啞科不能盡聲所苦以告師師又不褻悉乎問切之義所以但知其身熱不知其頭疼身痛也但知其不思飲食心胸膨脹疑其內傷乳食安知其疫邪傳胃也但見嘔吐惡心口渴下利以小兒吐瀉為常事又安知其協熱下利也凡此何暇致思為時疫二也小兒神氣嬌怯筋骨柔脆一染時疫延捱失治即便二目上吊不時驚搐肢體發痙十指鈎曲甚則角弓反張必延幼科正合渠平日學習見聞之證多誤認為慢驚風遂投抱龍丸竭盡驚風之劑轉治轉劇因見不啼不語又將神門眉心亂灸艾火雖微內攻甚急兩陽相搏如火加油紅爐添炭死者不可勝紀深為痛憫今凡遇疫毒流行大人皆染小兒豈獨不染耶但所受之邪則一因其氣血筋骨柔脆故所現之證為異且務宜求邪施治故用藥與大人彷彿凡五六歲以上者藥當減半二三歲者四分之一可也又腸胃柔脆少有差誤為禍更速臨證尤宜加慎

小兒太極丸

天竺黃 五錢

膽南星 五錢

大黃 三錢

麝香 三分

冰片 三分

殭蠶 三錢

右為細末端午日午時修合糯米飯杵為丸如芡實大硃砂為衣遇疫證薑湯化服一丸神效

○正名

傷寒論曰發熱而渴不惡寒者為溫病後人去之加牙為瘟即溫也如病證之證後人去登加正作証後又去言加牙為症又如滯下古人為下利膿血蓋以瀉為下利後人加牙為痢要之古無瘟痢症三字乃後人之自為變易者不可因易其文以溫瘟為兩病各指受病之原乃指冬之伏寒至春至夏發為溫熱又以非時之氣為瘟疫果爾又當異證異脈不然臨治之際何以知受病之不同也設使脈病不同病原各異又當另立方論治法徒立證名而無方法反令枝節愈繁而正意愈亂學者未免有多歧之感夫溫者熱之始熱者溫之終溫熱首尾一體故又為熱病即溫病也又名疫者以其延門闔戶如徭役之役眾

人均等之謂也今省去加戶為疫又為時疫時氣者因其感時行戾氣所發也因其惡厲又謂之疫厲終於得汗而解故燕冀名為汗病此外又有風溫濕溫即溫病夾外感之兼證名各不同究其病則一然近世稱疫者眾書以溫疫名者弗遺其言也後以傷寒例反諸家所議凡有關於溫疫其中多有誤者恐致惑于來學悉米以正焉

○傷寒例正誤

陰陽大論云春氣溫和夏氣暑熱秋氣清涼冬氣冷冽此則四時正氣之序也冬時嚴寒萬類深藏君子固密則不傷于寒觸冒之名乃名傷寒且其傷于四時之氣皆能為病以傷寒為毒者以其最成殺厲之氣也中而即病者名曰傷寒不即病者寒毒藏于肌膚至春變為溫病至夏變為暑病暑病者熱極重于溫也

成註內經曰先夏至為溫病後夏至為暑病溫暑之病本於傷寒而得之

正誤按十二經絡與夫奇經八脈無非營衛氣血週布一身而營養百骸是以天真元氣無往不布於肌膚不布則麻木不仁造化之機無刻不週於臟府不週則神機頓息卒然仆絕然風寒暑濕之邪與吾身之營衛勢不兩立一有所中疾苦作矣苟或不除不危即斃傷寒例言冬時嚴寒所傷中而即病者為傷寒不即病者至春變為溫病至夏變為暑病然風寒所傷輕則感冒重則傷寒即感冒一證風寒所傷之最輕者尚爾頭疼身痛四肢拘急鼻塞嚴重痰嗽喘急惡寒發熱當即為病不能容隱今冬時嚴寒所傷非細事也反能藏伏過時而發耶更問何等中而即病何等中而不即病何等中而即病者頭痛如破身痛如杖惡寒頂強發熱如火或喘或嘔甚則發瘧六脈疾數煩躁不寤至後傳變不可勝言倉卒失治乃致傷生何等中而不即病者感後則一毫不覺即而延至春夏當其已中之後未發之前飲食起居如常神色氤氳纖毫不異其已發之證勢不減于傷寒况風寒所傷未有不由肌表而入所傷皆營衛所感均係風寒一者何其憺情藏而不知一者何其靈異感而即發同源而異流天壤之隔豈無說耶既無其說則知溫疫之原非風寒所中矣且言寒毒藏於肌膚之間肌為肌表膚為皮

之淺者其間一毫一數無非營衛經行所攝之地即感冒些小風寒尚不能稽留當即為病何況受嚴寒殺厲之氣且感于皮膚最淺之處反能容隱者耶以此推之必無是理矣凡治客邪大法要在表裏分明所謂未入于府者邪在經也可汗而已既入于府者邪在裏也可下而已果係寒毒藏于肌膚雖過時而發邪氣猶然在表治法不無發散邪從汗解後世治溫疫病者若執肌膚在表之邪誤投發散非徒無益而又害之矣凡病先有病因方有病證因證相參然後始有病名稽之以脈而後可以言治假令傷寒中暑各以病邪而立名今熱病以病證而立名上又所言暑病反不若言熱病者尚可糺糊若以暑病為名暑為病邪非感盛夏之暑不可以言暑若言暑病乃香薷飲之證彼此豈可相混凡客病感邪之重者則病甚其熱亦甚感邪之輕者則病輕其熱亦微熱之微甚存乎感邪之輕重也二三月及八九月其時亦有病重大熱不止失治而死者五六月亦有病輕熱微不樂而愈者凡溫疫四時皆有但仲夏感者多春秋次之冬時又次之但可以時令分病之多少不可以時令分熱之重輕也是以辛苦之人春夏多溫熱證者皆因冬時觸寒所致非時行之氣也凡時行者春時應煖而復大寒夏時應熱而反大涼秋時應涼而反大熱冬時應寒而反大溫此非其時有其氣是以一歲之中長幼之病多相似者此則時行之氣也

然氣候亦有應至而不至或有至而太過者或未應至而至者皆成病氣也

正誤按春溫夏熱秋涼冬寒乃四時之常風雨陰晴稍為損益假令春應煖而反多寒其時必多雨秋應涼而熱不去者此際必多晴夫陰晴旱潦之不測寒暑損益安可以為拘此天地四時之常事未必為疫夫疫者感天地之戾氣也戾氣者非寒非暑非煖非涼亦非四時交錯之氣乃天地別有一種戾氣多見於兵荒之歲間歲亦有之但不甚耳上文所言長幼之病多相似者此則為時行之氣雖不言疫之意寓是矣殊不知四時之氣雖損益于其間及其所感之病終不離戾之本源假令正二月應煖偶因風雨交集天氣不能溫煖而多春寒所感之病輕則為感冒重則為傷寒原從感冒傷寒法治之但春寒之氣終不若冬時嚴寒殺厲之氣為重投劑不無有輕重之分此即應至而不至至而不去

二事也又如八九月適多風雨偶有暴寒之氣先至所感之病大約與春寒彷彿深秋之寒終不若冬時殺厲之氣為重此即未應至而至即冬時嚴寒倍常是為至而太過所感亦不過即病之傷寒耳假令夏時多風雨炎威少息為至而不及時多亢早燥石流金為至而太過太過則病甚不及則病微至於傷暑一也其病與四時正氣之序何異耶治法無出于香需飲而已

其冬時有非節之煖名曰冬溫

正誤此即未應至而至也按冬傷於寒至春變為溫病今又以冬時非節之煖為冬溫一感於冬寒一感於冬溫一病兩名寒溫懸絕然則脈證治法又何似耶天四氣乃二氣之離合也二氣即一氣之升降也升極則降降極則升升極之降為陰陽離離則氣亢氣亢則致病亢氣者冬之大寒夏之大暑也將升不升將降不降為陰陽合合則氣和氣和則不致病和氣者即春之溫煖秋之清涼也是以陰極而陽氣來和為溫煖陽極而陰氣來和為清涼斯有既濟之道焉易曰一陰一陽之謂道偏陰偏陽之謂疾得其道未有反致其疾者若夫春寒秋熱為冬夏之偏氣倘有觸胃之者固可以為疾亦無於感寒傷暑未可以言疫若夏涼冬煖轉得春秋之和氣豈有因其和而反致疾者所以但見傷寒中暑未嘗見傷溫和中清涼也溫煖清涼未必為病又焉可以為疫

從春分以後至秋分節前天有暴寒者皆為時行寒疫也三月四月或有暴寒其時陽氣尚弱為寒所折病熱猶輕五月六月陽氣已盛為寒所折病熱所重七月八月陽氣已衰為寒所折病熱亦微其病與溫及暑病相似但有殊耳

正誤按四時皆有暴寒但冬時感嚴寒殺厲之氣名傷寒為病最重其餘三時寒微為病亦微又以三時較之盛夏偶有些小風寒所感之病更微矣此則感寒之重病亦重而熱亦重感寒之輕病亦輕而熱亦輕是重於冬而畧於三時至夏而又畧之此必然之理也上文所言三四月陽氣尚弱為寒所折病熱猶輕五六月其時陽氣已盛為寒所折病熱為重七八月其時陽氣已衰為寒所抑病勢亦微由是言之在冬時陽氣潛藏為寒所折病熱更微此則反是夏時感寒為重冬時感寒為輕前後矛盾于

理大違又春秋夏三時偶有暴寒所著與冬時感冒相同治法無二但可名感冒不當另立寒疫之名若又以疫為名殊類畫蛇添足

○諸家溫疫正誤

雲岐子 傷寒汗下不愈而經過其證尚在而不除者亦溫病也 如太陽證汗下後過經不愈診得尺寸脈俱浮者太陽溫病也 如身熱目痛汗下後過經不愈診得尺寸脈俱長者陽明溫病也 如胸脇痛汗下後過經不愈診得尺寸脈俱絛者少陽溫病也 如腹滿噎乾診得尺寸脈俱沉細過經不愈者太陰溫病也 如口燥舌乾而渴診得尺寸俱沉過經不愈者少陰溫病也 如煩滿囊縮診得尺寸俱微緩過經不愈者厥陰溫病也是故隨其經而取之隨其證而治之 如發斑乃溫毒也

正誤按傷寒叙一日太陽二日陽明三日少陽四日太陰五日少陰六日厥陰為傳經盡七日復傳太陽為過經雲岐子所言傷寒過經不愈者便指為溫病竟不知傷寒溫病自是兩途未有始傷寒而過經變為溫病者若果溫病自內達外何有傳經若能傳經即是傷寒而非溫病明矣

汪石山 愚謂溫與熱有輕重之分故仲景云若遇溫氣則為溫病此叔和之言更遇溫熱氣即為溫毒熱比溫尤重故也 但冬傷於寒至春而發不感異氣名曰溫病此病之稍輕者也 溫病未已更遇溫氣變為溫病此病之稍重者也 傷寒例以再遇溫氣名曰溫疫 又有不因冬月傷於寒至春而病溫者

此特感春溫之氣可名春溫如冬之傷寒秋之傷濕夏之中暑相同也按陰陽大論四時正氣之序春溫可名春溫若感秋涼之氣可名秋涼病矣春溫可以為溫病秋涼獨不可為涼病乎今特感春溫之氣涼病似覺難言勉以濕證糖塞既知秋涼病有碍反而思之則知春溫病殊為謬妄矣 以此觀之是春之病溫有三種不同有冬傷於寒至春變為溫病者有溫病未已再遇溫氣而為溫病者有重感溫氣相雜而為溫病者有不因冬傷於寒不因更遇溫氣只於春時感春溫之氣而病者若此三者皆可名為溫病不必各立名色但要知其病原之不同也

正誤按病各有病因如傷寒自覺觸冒風寒如傷食自覺飲食過度各有所責至於溫病乃伏邪所發多有安居靜養別無他故倏焉而病詢其所以然之故無處尋思况求感受之際且自不覺故立論者

或言冬時非節之煖或言春之溫氣或言傷寒過經不解或言冬時伏寒至春夏乃發按冬傷於寒春必病溫出自素

問比漢人所撰晉時王叔和或指冬不藏精春必病溫此亦漢人所撰但言斷又見冬時之溫病與春又以此述傷寒例蓋順文之誤

夏之溫疫脈證相同治法無異據云冬時即病為傷寒今溫病亦發於冬時思之至此不能無疑乃覺

前人所論難憑務求其所以然之故既不可言傷寒又不可言伏寒因以冬時非節之煖牽合而為病

原不思嚴寒酷暑因其鋒利人所易犯故為病最重至于溫煖乃天地中和之氣萬物得之而發育氣

血得之而融和當其肅殺之令權施仁政未有因其仁政而反蒙其害者切嘗較之冬時未嘗溫煖亦

有溫病或遇隆冬暫時溫煖亦有溫病感溫之由亦無確據既不過猜疑之說焉足以為定論或言感

三春當令之溫氣為溫病夫春時自應溫煖責之尤其無謂或言溫病復感溫氣而為溫病正如頭上

安頭或言傷寒汗下過經不愈者為溫病則又指鹿為馬活人又以夏應暑而寒氣折之責邪在心為

夏溫秋應涼而大熱折之責邪在肺為秋溫轉屬支離陶氏又以秋感邪氣而為秋溫明是雜證叙溫

者絡繹議論者各別言愈繁雜而本原愈失使學者反增亡年之感與醫道何補

活人書云夏月發熱惡寒頭疼身軀肢節痛重其脈洪盛者熱也冬傷於寒因暑氣而發為熱痛溫熱病

與傷寒同有汗宜桂枝湯無汗宜麻黃湯如煩燥宜大青龍湯然夏月藥性須帶涼不可大溫桂枝麻黃

大青龍湯用加減夏至前桂枝加黃芩夏至後桂枝麻黃大青龍加知母石膏或加升麻蓋桂枝麻黃性

熱地方煖處非西北之比夏月服之必有發黃發斑之失熱病三日外與前湯不瘥脈勢仍數邪氣猶在

經絡未入藏府者桂枝石膏湯主之此方夏至後可代桂枝證若加麻黃可代麻黃青龍湯證也若三月

至夏為晚發傷寒梔子升麻湯亦暫用之王宇泰述萬應癸卯李氏一增應舉南下時方感暑傷寒一大

桂枝二湯隆冬正傷寒之藥施於溫病不可沉于熱病乎

正誤按活人書以溫熱病用桂枝麻黃雖加涼藥終未免發散之誤不危幸矣豈止三日外與前湯不

瘥脈勢仍數而已哉至此尚然不悟為半裏之證尚言邪氣猶在經絡仍用桂枝石膏湯至死無悔王

字泰非之甚當是以不用麻黃桂枝賢子活人書遂矣究竟不識溫熱之源是以不知用藥耳

春溫 活人書曰春應溫而清氣折之責邪在肝或身熱頭疼目眩嘔吐長幼率相似升麻葛根湯解肌湯四時通用敗毒散 陶氏曰交春後至夏至前不惡寒而渴者為溫病用辛涼之藥微解肌不可大發汗急證見者用寒涼之藥急攻之不可誤汗誤下當須識此表證不與正傷寒同法裏證同法

夏溫 活人書曰夏應暑而寒氣折之責邪在心或身熱頭疼腹滿自利長幼率相似理中湯射干湯半夏桂枝湯 陶氏曰交夏至有頭疼發熱不惡寒而渴此名溫病愈加熱者為熱病只用辛涼之藥解肌不宜大汗裏證見者急攻下表證不與正傷寒同法裏證治法同

秋溫 活人書曰秋應涼而大熱折之責邪在肺溫熱相搏民病咳嗽金沸草散白虎加蒼朮湯病瘧發黃茵陳五苓散 陶氏曰交秋至霜降前有頭疼發熱不惡寒身體痛小便短者名濕病亦用辛涼之藥加疎利以解肌亦不宜汗裏證見者宜攻下表證不與正傷寒同法

冬溫 活人書曰冬應寒而反大溫折之責邪在腎宜姜糖湯 丹溪曰冬溫為病非其時而有其氣者冬時嚴寒君子當閉藏而反發洩於外專用補藥帶表藥

正誤按西北高厚之地風高氣燥濕證希有南方卑濕之地更遇久雨淋漓時有感濕者天氣或時久雨或時亢旱蓋非時令所拘故傷濕之證隨時有之不待交秋而後能也推節菴之意以至春為溫病至夏為熱病至秋似不可復言溫熱然至秋冬又未免溫病只得勉以濕證抵搪且濕為雜證更不可借此混淆惟其不知溫病四時皆有故說到冬時遂付之不言王宇泰氏因見陶氏不言乃引丹溪述非其時而有其氣以補冬溫之門然則冬時交錯之氣又不可以為冬溫也活人但言四時之溫蓋不知溫之源故春責清氣夏責寒氣秋責熱氣冬責溫氣殊不知清溫寒熱總非溫病之源復以四時專令之藏而受傷不但膠柱鼓瑟且又罪及無辜

## 新秤藥量表

本書所載用藥量均爲老秤。現在藥店均用新秤，但以市新秤合老秤一兩，應升爲一兩一錢七分三厘。因老秤八錢五分二厘半卽市秤一兩。恐閱者誤會，故將新老比較表附列如下：

老 秤	新 秤
五 分	合五分八厘強可用六分
一 錢	合一錢一分七厘強可用一錢二分
一錢五分	合一錢七分五厘強可用一錢八分
二 錢	合二錢三分四厘強可用二錢四分
二錢五分	合二錢九分三厘強可用三錢
三 錢	合三錢五分一厘強可用三錢五分
四 錢	合四錢六分九厘強可用四錢七分
五 錢	合五錢八分六厘強可用六錢
六 錢	合七錢零三厘強可用七錢
七 錢	合八錢二分強可用八錢二分
八 錢	合九錢三分八厘強可用九錢五分
九 錢	合一兩零五分五厘強可用一兩零五分
一 兩	合一兩一錢七分三厘可用一兩二錢
一兩以上	照前類推